

YOHANES

Ditiki Σε Nə Yohanes Ləwəni

Onanto Eto Ditiki Nni Nə Ləətə Nkpə.

- 1 Ditiki nəmə akε fε báyifo kawunsiə.
Ditiki nəmə ku Onanto lεkε.
Nya Ni ku Onanto ni əni.
- 2 Ditiki nəmə ku Onanto lεkε taa kasə ket-
syikokə.
- 3 Eye lə wəə, nya Onanto díyifo lesa saa nε.
Bényifo kulesa nə wə dímanke lenti.
- 4 Ditiki nəmə əətə nkpə,
nya nkpə bomə əflo betidi dínyə diyənde
betsyiko.
- 5 Diyənde nəmə əəyənde kakpo lə ketuntu
əsüə.
Fεε ketuntu kamə mamfoto diyənde nəmə
bəninsə.
- 6 Onanto átsyese utidi utsyuə. Wə diye ni
Yohanes. 7 Úbə nkə woedi betidi etiki itsyiko
lə diyənde nəmə əsüə bə lə utsyuə saa wə lenə
ditiki nəmə lə ofo ənc. 8 Inni Yohanes kosate ni
diyənde nəmə. Bomu úbə nkə lə udi etiki itsyi
lə diyənde nəmə əsüə. 9 Nyamfo ni lekpasə
kosate nəmə nε, lekpasə nə nle kawunsiə bubə
nə luuyənde ditə utsyuə saa lekpasə.
- 10 Ditiki nəmə ákε lə kawunsiə, nya wə əsüə
Onanto leyε úyifo kawunsiə, fεε kawunsiə eto
betidi mənnyə wə bətsyε lekpo. 11 Úbə wə
kosate eto betidi əflo, fεε wə betidi mámfo wə.
- 12 Fεε bətsyuə ete léfo wə. Nya mba kenke léfo

wə bǎncɔ, útə mə əsuəale nnya dítə báfiani Onanto eto bebi. ¹³ Bámfiani Onanto eto bebi eye læ kawunsia eto ditsyebi əsuə nye eye læ usə ku usia eto ubilele eto ketsyue əsuə. Bomu Onanto kosate letɔncɔ nkə woafɔ mə læ bafiani wə bebi.

¹⁴ Ditiki nəmə əbə léfiani utidinini wə dísiə læ bo nti, nya úyi ku Onanto eto lefonə ku sitinti kenke. Nya búnyə wə diyənde kplə nə eto okle ófo útsyiko wə anto ɔflɔ fe Onanto eto Ubi ɔni kplo eso.

¹⁵ Yohanes ələkə wə óte betidi læ lefe nə óbe letsya. Ófa óteyi nkə, “Nwəmfo ni utidi wə əsuə míndi etiki mintsyiko minkə, ‘Nwə ntəkə mə kama ɔnlɛ bubəə, amɔ oso mə, itsyise okpe koko fe bále mə.’ ”

¹⁶ Eye læ wə lefonə kplə əsuəə, ókpo bomblɛ kenke atsyɔ kpə. ¹⁷ Itsyise Onanto ətə bo kɔfi komə eye læ Moses əsuə. Fɛɛ wə lefonə ku sitinti siamə əbə bo ɔflɔ eye læ Yesu Kristo əsuə.

¹⁸ Kuutsyue saa mənnyə tɔ Onanto unyə. Wə ubi ɔni kplo wə lekate ko Onanto wə nsi læ wə Anto əmə eto akɔɔ, wə ni díbə úləkə futsyɔ Onanto ni óte bo nɛ.

Yohanes Ələkə Óte Nkə Inni Wə Ni Nwə Onanto Lékpɔ Ɔhile Utsyə.

¹⁹ Yudafo eto beninə ba nkpe læ Yerusalem ákpe besumunyə ku Lewifo bésu Yohanes ɔflɔ. Bátɔ wə bənkə, “Owoe ko feni?”

²⁰ Mfóo, Yohanes mánni mbuaye butə bomu ókpasə mə nkə, “Inni mɔ ni Nwə Onanto Lékpɔ Ɔhile Utsyə.”

21 B́ato wə bənkə, “Nyale owoe feni? Fə ni Unyeləkətidi Elia?”

Útə mə mbuaye nkə, “Inni mə ni.”

Bésukosə b́ato wə bənkə, “Nyale, fə ni Unyeləkətidi wə b́ateyi bətsyə bə wuubə?”

Útə mə mbuaye nkə, “Owo lo.”

22 Nyaso b́ato wə bənkə, “Teyi bo lesatsyuə nə busu b́ateyi mba lékpe bo koto! Owoe feni? Nya be fanle b́ateyi itsyi læ fə əsuə?”

23 Yohanes ətə mə mbuaye fe kase Unyeləkətidi Yesaya læwoni utsyə nkə, “Mə ni utidi wə nle bofa læ mfiminti kafe eto okəe katəyi nkə, ‘Betsyonsə Bonamute eto kusu bitsyə itə wə bubə!’ ”

24 Nya betidikpekpe ba d́itsyi Yudafo ba baakpo Farisifo oflo bəbəə, 25 leto Yohanes bə, “Lenni fə ni Nwə Onanto Lékpó Ohile Utsyə, nye Elia, nye unyeləkətidi əməə, ntsyə ibə fə fanle ntuflesəfləsə eto lekpa buyifo?”

26 Yohanes ətə mə mbuaye nkə, “Mə aləə, meefi ntu keyifo ntuflesəfləsə eto lekpa nəmfo. Fəə utidi utsyuə nyə mi lenti, wə binnyi.

27 Utəkə mə kama olə bubə nya wə afokpa eto kekue mənnyə ntə kulaa tsya bə nyankli.”

28 Asa nyamfo əbə læ Betania eto umə læ Yordan eto ketu eto ditukpenkpe nə nse. Mfó Yohanes nle ntuflesəfləsə eto lekpa buyifo kətə betidi nə.

Yesu Ni Onanto Eto Lesamubi Nə Boofi Bətə Kedi.

29 Kəsiasəə, Yohanes ənyə Yesu nle wə oflo bubə nya óteyi mba nyə wə læ oflo nkə, “Nyə

Onanto eto Lesamubi nə ntsyi kawunsia eto abua ontanko. ³⁰ Wə ni utidi wə əsuə mĩnteyi mintsyiko lefe nə mĩndi etiki mĩnteyi minkə, 'Utidi utsyuə təkə mə kama ɔnlɛ bubə wə lɛmɔ onso mə, itsyise okpe kokooko fɛ bále mə.' ³¹ Mɔ kosate tsya mán̄te utidi əmə. Fɛɛ wə bubə eso mĩmbə minlɛ ntuflesəfləsə eto lekpa nəmfo buyifo bə lə nləkə wə nte Israel eto kusə eto betidi."

³² Mfó nya Yohanes dis̄i ɔt̄eyi lə wə əsuə nkə, "Nnyə miə Onanto eto Lɛwɔnɔ áyifə dítsyi kato dísiə lə wə əsuə fe ləblekpa seka. ³³ Tutɛ mán̄te miə wə uni. Fɛɛ lefe nə Onanto lét̄syese mə nkə mbə keyifo ntuflesəfləsə eto lekpa nəməə, ɔt̄eyi mə nkə, 'Ebunyə se mɔ Lɛwɔnɔ lɔyifə ditsyi kato dibə dis̄iə lə utsyuə əmə əsuə, ete ebote fə wə ni utidi wə luufi Lɛwɔnɔ Kɛnkɛ ukeyifo ntuflesəfləsə eto lekpa nəmə nɛ.' ³⁴ Nya mĩnyə se íbə nkomə lə utidi əmfo əsuə. Nya minlɛ mi bɔt̄eyi sitinti miə wə ni Onanto eto Ubi kosate əmə nɛ."

Betidi Tutɛ Ba Dítkəko Yesu.

³⁵ Kəs̄iəsəə, Yohanes ku wə bakasebi inuə si bənyə mfó ke, ³⁶ nya únyə Yesu díbə ɔnlɛ bofe. Nya se únyə wəə, ɔt̄eyi nkə, "Bebɛɛ, nyə Onanto eto Lesamubi nəməə!"

³⁷ Bakasebi inuə bamfo áno nnya Yohanes lét̄eyi nya béd̄u bésu bətəkəko wə. ³⁸ Se Yesu lét̄syi ɔwuninsə únyə nkə bətəkəko wəə, ɔto mə nkə, "Be biabɛɛ?"

Bətə wə mbuayɛ bənkə, "Rabi," eto kasɔ ni Oteasa, "Lekpakpa, se fankpe?"

³⁹ Ótɛyi mə nkə, “Bibə bebe.” Lefe nəmfó ebutsyə fe ditsyitsyo eto abombo ana seka.

Nyaso bətəkəko wə bésu kaka onkpe, nya bəsiə wə lə oflo diyi fəfə nəmə.

⁴⁰ Bakasebi inuə ba lenɔ Yohanes eto ditiki nəmə fə bətətəko Yesuu, eto ɔni ni Andrea wə ni Simon Petro eto ɔyimi. ⁴¹ Lesa tutɛ nə Andrea əmə díyifo ni bə úsu óbɛbɛ wə ɔyimi, ini Simon nya ótɛyi wə nkə, “Búnyə Mesia əmə,” eto kasɔ ni Kristo wə ni Nwə Onanto Lékpɔ ɔhile Utsyə. ⁴² Nya ókpa Simon úsuko Yesu oflo.

Yesu ábe wə tũũ, nya ótɛyi wə nkə, “Fə ni Simon, Yohanes eto ubi. Idu mómɔ ɛntɔɔ, bookpo fə bə Kefas,” nye Petro eto kasɔ ni kobansə.

Yesu Ákpadi Filipino Ku Nataniel.

⁴³ Kəsiəsiə, Yesu ála nkə weesu kasɔ ka baakpo bə Galilea. Nya se ɔnye ɔntɔɔ, únyə utsyuə wə baakpo Filipino nya ótɛyi wə nkə, “Bətəkəko mə.”

⁴⁴ Filipino etsyi Betsaida, umə wə Andrea ku Petro tsya ditsyi. ⁴⁵ Se Filipino dísu únyə Nataniel, ótɛyi wə nkə, “Búunnyə utidi əmə əsuə Moses ku Onanto eto bənyɛləkətidi ləwɔni asa betsyiko bətsyə lə Awɔnisa Kenkə eto Kukue əsuə! Wə ni Yosef eto ubi Yesu wə ditsyi Nasaret!”

⁴⁶ Nataniel átɔ nkə, “Lesə sɛɛ ditsyuə ebofo bɔbɔ ketsyi Nasaret kəbəə?”

Filipo átɛyi wə nkə, “Bə lə əbə abe!”

47 Se Yesu dínyə Nataniel leyɛ onlɛ wə oflɔ bubəə, ótɛyi itsyi lə wə əsuə nkə, “Nyə Israel-nyə tinti nlɛ bubə məə, woanwɛ betidi.”

48 Nataniel áto wə nkə, “Ntsyə féyifo fáte utidi wə eto okle mini?”

Yesu ətə mbuayɛ nkə, “Fɛ Filipino díbə ókpadi fə lə lefe nə fake lə koto komə kalɔ, mbúnyə fə koko.”

49 Nataniel átɛyi wə nkə, “Oteasa, eyifo Onanto eto Ubi kosate. Fə ni Israelfɔ eto Oka əmə!”

50 Mfó nya Yesu létɔ wə nkə, “Eni nnya míntɛyi fə miə nnyə fə lə koto komə kalɔ eso fáfo fánɔɔ? Ebunyə asa nnya nsi nso nyamfo.”

51 Nya ótɛyi mə nkə, “Sitinti minlɛ mi bətɛyi minkə, biunyə se kato lɔsini nya Onanto eto batɔnkpe nlɛ kato bobɛ kɛsu kayifə kəbə mə, Utidi eto Ubi, oflɔ.”

2

Bákpa Kusie Lə Kana.

¹ Lə diyi tsyɛfə əsuəə, bákpa kusie kutsyuə lə umə wə baakpo Kana lə Galilea eto kasɔ. Yesu eto ambe Maria ákɛ mfó. ² Nya bákpadi Yesu ku wə bakasebi tsya báboko kusie kakpakɔ kamə. ³ Se nte bo banlɛ bunə léloo, Yesu eto ambe əbə Yesu oflɔ nya ótɛyi wə nkə, “Nte bo banlɛ bunə álo.”

⁴ Mfó Yesu létɛyi wə nkə, “Mbe, yanlɛ bə tɛyi mɛ lesa nə ele bə nyifo. Mə lefe mányo tɔ.”

⁵ Nya Yesu eto ambe létɛyi besumubi bamə nkə, “Biyifo lesa nə kee wɔtɛyi mi nkə biyifo.”

⁶ Se ini lekpa ídi itə Yudafə bə bəflə mə əsuə esoo, bətsyə ntu eto kalotsyi kplə ekua ka bələkə lə abansə əsuə mfó. Nya ketulotsyi ənə nye ekua leeyi ɔlotsyi kplə ɔni. ⁷ Mfó nya Yesu lətyei besumubi bamə nkə békuti ntu bəyisə kalotsyi kplə kamə. Nyaso békuti ntu bəyisə kalotsyi kplə kamə klələlələ.

⁸ Mfó nya ɔtyei mə nkə, “Bikuti ntu bomə eto ntsyuə bisuko utidi wə nsi lə ketsyue kamə eto kənyɛ.” Nya békuti mu bésuko wə.

⁹ Se útu ntu bo léfiani nte óbee, wə ánte kaka nte bomə dítsyi. Fɛɛ besumubi ba díkuti ntu bomə bésuko alɛɛ, məmə áte. Nyaso nwə nsi lə ketsyue kamə eto kənyɛ ákpadi okafɔsə əmə, ¹⁰ nya ɔtyei wə nkə, “Utsyuə saa, nte sɛɛ woaka betidi butə bəənə, nya lə betidi ənə bəkpə eto kamaa, nya fɛ weefi mbo dimanləkə kətə betidi ləənə nɛ. Fɛɛ fə ébu nsɛɛ ətsyə kama!”

¹¹ Nnya díbə lə Kana lə Galilea eto kasə mfóo, ni ayanisa tute nnya úyifo. Úyifo nyamfo úləkə wə diyənde óte, nya wə bakasebi léfo wə bánə.

¹² Nyamfo eto kamaa, Yesu ku wə ambe, ku wə bayimi, ku wə bakasebi édu bésu Kaper-naum nya bəsie mfó eyi asiani.

Yesu Ála Mba Nlɛ Bíkə Bote Lə Disumuyo.

¹³ Ukpə Ása Bo Óyila eto didife eboyo elo, nyaso Yesu ésu Yerusalem. ¹⁴ Se údufə Onanto eto Disumuyoo, únə se betidi nlɛ banantsyui ku basamu ku ablonuma bote ku mba laafloma atabi tsya nsi lə mə kapunu eto akə. ¹⁵ Nyaso ófio ukuə nya úfi wə óla basamu ku banantsyui

kenke óbòsə lə Disumuyo mfó. Úsensə mba nle atabi boba eto atabi úwui nya úkə mə kapunu ókpo lə kasó. ¹⁶ Ótəyi mba nle ablonuma bote nkə, “Bitsyi asa nyamfo bebónko lə mfo, nya biemfi mə Anto eto diyo biyifo bikəkateko.”

¹⁷ Nya wə bakasebi lékloma nnya Awónisa Kenke eto Kukue letəyi nkə, “Onanto, mə lelabi itə fə Disumuyoo, etə ənəmi ase me lə ni əsuə.”

¹⁸ Yudafo eto beninə əbə Yesu oflo nya bátó wə bənkə, “Se féyifo asa nyamfo məə, nte ayanisa nnya fuuyifo ate bo bə akpe kusu feeyifo nnya okle?”

¹⁹ Yesu etə mə mbuaye nkə, “Beba Onanto eto Disumuyo kamfo, nya mootakasə ke nyənsə lə diyi tsyəfə əsuə!”

²⁰ Yudafo bamə átó wə bənkə, “Disumuyo ka befi ałefosi ana ałe akua bátóo, bətəyi fanle fə ebusinkli atakasə ke ənyənsə lə eyi ətsyə əsuə?”

²¹ Fəə bántə bə wə sinə əsuə onle etiki budi ketsyiko fe Onanto eto Disumuyo. ²² Nyaso lefe nə Onanto létakasə wə utsyiko ókóməə, nya fe wə bakasebi lékloma bə ótəyi nko utsyə. Nyaso báfo asa nnya bəwóni bakpe lə Awónisa Kenke eto Kukue ku nnya Yesu letəyi báno.

Yesu Yi Asa Itsyi Lə Utidinini Əsuə Wuee.

²³ Lefe nə Yesu ləke lə Yerusalem lə Ukpə Ása Bo Óyila eto diyididi lefee, betidi kpə áfo wə báno lə ayanisa kpə nnya bənyə úyifo eso.

²⁴ Fəə Yesu mémfi wə əsuə utə mə, itsyise uyi betidi kenke. ²⁵ Yensife bə kuutsyuə saa si

oteyi wə kulesa itsyi læ betidi əsuə itsyise wə kosate áte lesa nə læke læ mə ketu kəmiə.

3

Yesu Áte Nikodemo Asa.

¹ Lefe nəmfóo, Yudafo eto uninə ɔni wə baakpo bə Nikodemo akɛ læ mə ditsyukpa nə baakpo Farisifo nti. ² Kətsyə kanii, úbə Yesu ɔflo nya ɔteyi wə nkə, “Oteasa, buyi boə fə ni nwə ditsyi Onanto ɔflo fəbə, itsyise kutsyuə saa embofo ayanisa nnya feeyifo buyifo lenni Onanto nsi ko wə.”

³ Mfó nya Yesu leteyi wə nkə, “Sitinti minlə fə boteyi minkə, læ bensinkli utidi balee, wəmbunyə Onanto eto Sekadidi siamə.”

⁴ Nikodemo áto wə nkə, “Ntsyə bofo utidi wə díkabe businkli kale bio? Businkli ele bə usinkli udufə læ wə ambe eto kafo fə læ besinkli bale wə dinuəfə lee?”

⁵ Mfó nya Yesu leteyi wə nkə, “Nlə fə boteyi sitinti minkə, læ bánle utidi betsyiko læ ntu ku Onanto eto Ləwɔnɔ nəmə əsuəə, weembofo budufə læ Onanto eto Sekadidi siamə əsuə.

⁶ Utidiniii, bále wə eyɛ læ etidisuə əsuə. Fɛɛ nnya ditsyi læ Onanto eto Ləwɔnɔ əsuəə, bále wə læ Ləwɔnɔ əsuə. ⁷ Nyaso məntə læ iyifo fə naa læ nteyi fə miə ele bə bale fə bio. ⁸ Ufiəbi aaso kesu kakake ola, nya wə kɔsɔ hã faano, fɛɛ inni læ kaka utsyi ku kaka ɔntɔ. Nko inte itə utsyuə saa wə bále eyɛ læ Ləwɔnɔ əsuə nɛ.”

⁹ Mfó nya Nikodemo leto wə nkə, “Ntsyə nyamfo lofo bubə kətə?”

¹⁰ Yesu ətə wə mbuayɛ nkə, “Oteasa kplɛ feni læ Israel, ntsyə ibə fámanno nyamfo kaso?”

11 Nlɛ fə bɔtɛyi sitinti miə asa nnya bunyii, nnya əsuə boedi etiki ketsyiko nɛ. Nya lesa nə ke búkenyəə, ni əsuə boedi adansiə nɛ. Fɛɛ biamfo bo etiki nyamə kanɔ. ¹² Lə ndi fə etiki itsyi lə kasɔ mfo eto asa əsuə nya fámamfo mɛ ánɔɔ, ntsyə fofofɔ mɛ bofo kanɔ lə ndi fə etiki itsyi lə kato eto asa əsuə? ¹³ Nya kuutsyuə saa ménsu tɔ kato unyə enso mɔ, Utidi Eto Ubi wə ditsyi kato úbə kawunsiə mfo.

¹⁴ “Fɛ kase Moses lébesə owa wə béfi situ béyifo kato lə uyi əsuə lə mfimintii, nko ke ele bə babesə mɔ, Utidi Eto Ubi kato nɛ, ¹⁵ bə utidi wə ke léfo mɛ ónɔɔ, lə unyə nkpə manlo.

¹⁶ “Itsyise Onanto ála kawunsiə kamfo kon bənkə úfi wə Ubi ɔni kplo útə nkə utsyuə saa ke laafo wə kanɔɔ, lə ɔyɛ bukpə kanya, bomu lə unyə nkpə manlo. ¹⁷ Itsyise Onanto mántsyese wə Ubi kawunsiə nkə lə ubə olo ke dikpi, bomu bə lə uyifo ke Ofomfokətə.

¹⁸ “Utidi wə ke laafo wə Ubi kanɔɔ, bembolo wə dikpi. Fɛɛ utsyuə saa wə laamfo wə kanɔɔ, bóolo wə dikpi koko itsyise wóamfo Onanto eto Ubi ɔni kplo əmə ɔnɔ eso. ¹⁹ Kase baayɛ kaalo dikpi nɛmə ni bənkə, diyənde nɛmə əbə kawunsiə, fɛɛ betidi aala ketuntu kaso diyənde nɛmə, itsyise baala asa buayifoyifo kaso. ²⁰ Utsyuə saa wə leeyifo asa buaa, weekisi diyənde, nya woannyi kafi ni. Itsyise woate sikpi nkə lə ɔnyi ɔfi diyəndee, yuuləkə wə asa bua nnya weeyifo ote bənyə. ²¹ Fɛɛ utsyuə saa wə nsi nkpə lə kusu sɛɛ əsuəə, aanyi kafi diyənde, itsyise woala nkə diyənde

nəmə ləkə lete nkə kase unsi nkpə yɛ lə Onanto eto lelabi əsuə.”

Yohanes Ntufləsətidi Əmə Édi Etiki Lə Yesu Əsuə.

²² Lə nyamfo eto kamaa, Yesu ku wə bakasebi édu bésu Yudea eto lekpa ke mfó. Bəsiə mfó itə lefe ditsyuə, nya úkeyifo betidi ntuflesəfləsə eto lekpa. ²³ Lefe nəməə, Yohanes tsya ákɛ lə Aion lə Salim oflo kəfləsə betidi ntu, itsyise ntu abɔ lə mfó nya betidi ékesu wə oflo nya úkəfləsə mə ntu. ²⁴ Lefe nəmfóo, bəmmuə tɔ Yohanes beti bakpe lə aba eto diyo.

²⁵ Diyi lɔnii, etikinənə ətsyuə édufə lə Yohanes eto bakasebi ku Yudanyə utsyuə eto nti itsyi lə əsuəfləflə eto lekpa əsuə. ²⁶ Nyaso bəbə Yohanes oflo bətɛyi wə bə, “Oteasa, akloma utidi utsyuə wə fə ku wə dínyə lə Ketu Yordan eto ditukpenkpe nə nse, ini wə əsuə fédi adansie fetsyiko? Wə ni nwə mfe nle betidi ntuflesəfləsə eto lekpa buyifo nɛ, nya betidi ba kenke nle budu keso wə oflo.”

²⁷ Yohanes átɛyi mə nkə, “Kuutsyuə saa embofo kulesa bɔkɛ, lenni Onanto dífi ni útə wə. ²⁸ Mi kosate ni mə badansie bə ntɛyi mi nkpasə wuee miə inni mə ni Nwə Onanto Lékpɔ ɔhile Utsyə əmə. Fɛɛ Onanto létsyese mə nkə ntɔ wə setɔ. ²⁹ Nwə ni Okafɔsee, wə ni nwə mbə Okafɔ əmə nɛ. Fɛɛ nwə ni Okafɔsee əmə eto okloboo, lə unyə ɔlɛ Okafɔsee əmə eto ɔkɔɛ bɔɔɔ, yeakpe wə disuəyuə tinti. Nko əmə eso mintsya nle disuəyuə bunyə tinti fe

okafɔse əmə eto oklobo nɛ. ³⁰ Nya nko ele bə wə diye be kato lə mɔ lele lə dibə kasɔ nɛ.

³¹ “Nwə ditsyi kato ubəə, so utsyuə saa. Nya nwə ditsyi kasɔ mfo tsyaa, kasɔ mfo eto utidi ete uni. Nya kasɔ mfo eto asa eto etiki ete weedi. Fɛɛ nwə ditsyi kato úbəə, təkə məmblɛ kato. ³² Waatɛyi lesa nə úkənyə ku nnya úkanɔ mfó. Fɛɛ kuutsyuə saa aamfo wə sedansiedidi siamə. ³³ Fɛɛ nwə kɛ léfo wə kənyɛ kamə ɔ́nɔɔ, lɛ uyi bɔse kətə nkə Onanto eyifo utintinyə. ³⁴ Nwə Onanto létsyeseɛ, eedi Onanto eto etiki, itsyise Onanto éfi wə Lɛwɔnɔ úyisə wə əsuə kenke. ³⁵ Anto əmə aala wə Ubi əmə nya úfi lesa saa ókpe wə lə ani nɛ.

³⁶ “Nwə léfo Ubi əmə ɔ́nɔɔ, kpe nkɔpə manlo. Nya nwə laani weentsyue Ubi əmə kotoo, weembunyə nkɔpə manlo bomə. Bomu Onanto eto kotonənə manlo ebutəkə wə lə əsuə.”

4

Yesu Édi Etiki Ku Samariasio Utsyuə.

¹ Farisifo áno bə Yesu lɛ ntuflesəfləsə eto lekpa nəmə buyifo kətə betidi, nyaso betidi kɔpə təkəkɔ wə basɔ Yohanes. ² Lə sitintii, Yesu kosate ményifo ntuflesəfləsə eto lekpa útə kuutsyuə saa, bomu wə bakasebi hã díkeyifo nko. ³ Se Yesu léte nkə Farisifo áno ditiki nəmfo nkoo, údu lə Yudea eto kasɔ úsu Galilea eto kasɔ. ⁴ Nya lə kusu kɔ ɔnyɛ ɔntɔɔ, ele bə ɔyɛ Samaria eto kasɔ ofe.

⁵ Yesu ésu óyo Samaria eto umə wə baakpo Sikar, wə lɛfi kasɔ ka mə ona Yakob díte wə ubi Yosef. ⁶ Letidibo ditsyuə nə Yakob díku akɛ

mfó. Nya se ílæ Yesu fæ úsu óyo mfó læ nkóminti lefe itsyi læ kusu komæ eto boye esoo, úkænæ úsiæ læ letidibo næmæ oflo.

⁷ Nya ete Samariasio utsyuæ díbæ ntu keku-tiko. Nya Yesu leteyi wæ nkæ, “Tæ mæ ntu læ nnæ.” ⁸ Læ lefe næ mfó æsuæ, Yesu eto bakasebi ébudu bésu umæ didisa kayakó.

⁹ Usio æmæ átæyi nkæ, “Beso fæ Yudanyæ laato mæ Samariasio fæ ntæ fæ ntu læ ænæ?” Usio æmæ áto nko itsyise Yudafó ku Samariafó anka.

¹⁰ Yesu ætæ wæ mbuayæ nkæ, “Læ nnya ete fenyi lesa næ Onanto lætæ ku nwæ nle fæ bótó nkæ tæ wæ ntu læ unæ, eni fæ bomu ebótó wæ fæ utæ fæ ntu bo lætæ nkpæ.”

¹¹ Usio æmæ áto wæ nkæ, “Boanto, æmbæ lesa næ beefi kekuti ntu, nya letidibo næmæ tsya atsyo. Sie fuunyæ ntu bo lætæ nkpæ bomæ etsyiko? ¹² Lee fæ nso bo Ona Yakob wæ díku letidibo næmfo útæ bo, kaka wæ ku wæ bebi ku wæ bebuki kenke dínæ ntu betsyiko?”

¹³ Mfó nya Yesu díte wæ mbuayæ nkæ, “Læ betidi ænæ ntu bomfoo, utukue si wóle mæ.

¹⁴ Fæ ntu bo mæ luutæ, utukue ensi æmbóle nwæ luunæ mu. Ntu bo mæ luutæ wæ ebofiani nkpæ eto ntu eto kayakó læ wæ. Ntu bomfo ebukabódi læ wæ nya buutæ wæ nkpæ manlo.”

¹⁵ Usio æmfo átæyi wæ nkæ, “Boanto, tæ mæ ntu bomfo bæ læ utukue læ oyæ mæ bóle bio, nya læ nye mfo bubæ kekuti ntu.”

¹⁶ Yesu átæyi wæ nkæ, “Su akpadi fæ usæ læ bibæ.”

¹⁷ Usio æmæ átæyi wæ nkæ, “Minsi kusæ.”

Yesu átæyi wæ nkæ, “Átæyi sitinti fæ ensi kusæ.

¹⁸ Ébusiæko basani enó áfe. Nya nwæ fæ ku

wə nkpe mómó kulaa tsya enni fə usə. Sitinti fátayi.”

¹⁹ Usio emə átayi Yesu nkə, “Bonamute, nnyə miə eyifo Onanto eto unyeləkətidi. ²⁰ Bo Samariafɔɔ, bo banamə ésumu Onanto lə kɔtini komfo əsuə. Fɛɛ mi Yudafɔ aatayi biənkə Yerusalem ni kaka ele bə busumu Onanto.”

²¹ Yesu átayi wə nkə, “Usionko, fo mɛ anɔ fə lefe ditsyuə lə bubə nə betidi lensiembusumu Onanto lə kɔtini komfo əsuə nye lə Yerusalem.

²² Mi Samariafɔɔ, binyi lesa nə biesumu. Fɛɛ bo Yudafɔɔ, buyi futsyə boesumu. Itsyise Yudafɔ əsuə nnya bofokətə laayɛ kəbə. ²³ Fɛɛ lefe lɛ bubə nya díkəbə tsya koko, se betidi luusumu Anto əmə eyɛ lə kusu sɛɛ ku lə lɛwɔnɔ eto əsuəale ku lə sitinti əsuə. Itsyise mə ni besumunyə ba eto okle Onanto laala nkə besumu wə nɛ. ²⁴ Se Onanto ni Lɛwɔnɔ esoo, betidi ba luusumu wə, ele bə bayɛ lə lɛwɔnɔ nəmə eto əsuəale ku lə sitinti əsuə.”

²⁵ Usio əmə átayi wə nkə, “Nyi miə Nwə Onanto Lékpɔ Ɔhile Utsyə, wə baakpɔ Kristoo, ebubə. Nya lə ubə, wuuləkə lesa saa kasɔ ote bo.”

²⁶ Yesu átayi wə nkə, “Mɔ nwə nɛ etiki budi ku fə mfoo, mɔ ni wə nɛ.”

²⁷ Lefe nəmfóo, wə bakasebi bamə əbə bédufə nya íyifo mə naa se bənyə wə ɔnlɛ etiki budi ku usio. Fɛɛ mə kuutsyuə saa mántɔ usio əmə bə be woabɛɛ nye bátɔ wə bə beso ɔnlɛ etiki budi ku usio əmə.

²⁸ Usio əmə áyani wə ɔlɔtsyi əmə útsyə lə lɛtidibo nəmə ɔflɔ nya údu úsu umə úsu ɔtəyi betidi nkə, ²⁹ “Bibə bebe osani utsyuə wə lɛtəyi

mɛ lesa saa nə mínkeyifo mínyə lə mɔ nkpɛ!
Lee wə ni Onanto eto nwə Bákpo Ɔhile Bətsyɛ
əmə?” ³⁰ Nyaso betidi bamə ábo bətsyi umə
əmə bésu bə beesu bənyə wə.

³¹ Lefe nəmfóo, bakasebi bamə áɛ Yesu
lɛkpakpa bátɛyi bənkə, “Oteasa, bedi lesa!”

³² Fɛɛ ótɛyi mə nkə, “Nkpɛ lesa nə muudi nə
əsue binyi kulesa saa bitsyiko.”

³³ Nyaso bakasebi bamə étsyiko mə əsue
bɔtɔ bənkə, “Lee utsyuə áboko wə lesa údi?”

³⁴ Yesu átɛyi mə nkə, “Mɔ didisa ni bə nyifo
nwə lékpɛ mɛ eto lelabi, nya lə nlosə keyifo
ka útə mɛ nkə nyifo. ³⁵ Biatɛyi biənkə, ‘Afa
ana sɔ̃ kama fɛ lesa loobe oto.’ Fɛɛ nlɛ mi
bɔtɛyi minkə beɛ ola bebe kakue eto ditsyɛbi
lə bebe kase bidikə biamə díkabe! Bíoyo
nnya buləkə. ³⁶ Onanto aafɔ kayo nwə ləələkə
bidikə lə ɔkue nya waakpa mi kakpo lə unwu
itə nkpɛ manlo. Lə nyamfo eso nwə laato ku
nwə ləələkə, məmblɛ ebunyə disuəyue tinti.

³⁷ Nyaso nnya baatɛyi bə utidi ɔni laato nya
obamba ləələkə, eyifo sitinti. ³⁸ Mɔ létsyese mi
miə bisu biləkə bidikə lə ɔkue wə inni mi léto
bikə biamə. Betidi bamba díyifo keyifo kekɛleke
lə kasɔ ketsyikokɔ lə mfó, nya mi dínyə kutəkə
lə keyifo ka mə díyifo əsue.”

Samariafɔ Kpə Áfo Yesu Bánɔ.

³⁹ Samariafɔ kpə lə umə əmə áfo Yesu bánɔ
ɛyɛ lə nnya usio əmə létɛyi nkə, “Ótɛyi mɛ lesa
saa nə mínkeyifo lə mɔ nkpɛ əsue mínyə,” eso.

⁴⁰ Nyaso se Samariafɔ bamə díbə bənyə Yesu

lə lətidibo nəmə oflɔɔ, bále wə lekpakpa bə usiə lə mə oflɔ nya Yesu dísie mfó eyi ənuə.

⁴¹ Betidi bamba kpə esi báfo wə bánɔ lə wə ditiki nə údi mə eso.

⁴² Nya báteyi usio əmə bənkə, “Bófo bóno mómɔ inni lə nnya fáteyi bo eso, bomu bo kosate áno etiki nnya údi eso, nya buyi boə wə ni kawunsie kamfo eto Ofomfokətə tinti əmə.”

⁴³ Lə eyi ənuə eto kamaa, Yesu édu mfó úsu Galilea eto kaso. ⁴⁴ Itsyise wə kosate ələkə óteyi nkə, “Dibu anke kətə Onanto Eto Unyeləkətidi lə wə kosate eto kaso.” ⁴⁵ Fεε se Yesu dísu údufe Galilea, betidi bamə áfo wə atuu ku disuəyuə, itsyise se bésu Ukpə Ása Bo Óyila eto Diyisεε kedikɔ lə Yerusalem, bənyə asa nnya kenke úyifo.

⁴⁶ Lə nnya kamaa, Yesu ésinkli úsu Kana lə Galilea eto kaso, kaka úkatsyi ntu ówuninsə bófianni nte. Lefe nəmfóo, Aba eto unyəsie ninə utsyuə wə dítsyi Kapernaum eto ubi áno bufi. ⁴⁷ Se óno nkə Yesu etsyi Yudea úbə Galilea, úsu wə oflɔ nya óle wə lekpakpa nkə úsu Kapernaum lə usu otsya wə ubisaibi utə wə, itsyise wə ubi əmə fe woala lə ukpə.

⁴⁸ Yesu áteyi wə nkə, “Lə biənnnyə nyifo ayanisa ntee, biamfo mε kano.”

⁴⁹ Uninə əmfɔ ále wə lekpakpa óteyi nkə, “Bonamute, bə lə əbə abe mɔ ubi əmə bə lə oyε bukpə.”

⁵⁰ Mfó nya Yesu ləteyi wə nkə, “Su! Fə ubi əmə ebəke nkpə.”

Uninə əmə áfo etiki nnya Yesu ləteyi wə óno nya úsinkli údu. ⁵¹ Se úsinkli ɔntɔɔ, wə diyo

eto beyifoyifo betsyuə átsyako wə lə kusu nya bátəyi wə bənkə wə ubi əmə kpe nkpə. ⁵² Ótə mə lefe nə tutuutu íyuə wə ubi əmə. Nya bətə mbuayə bənkə, “Kənə ku kakəmi lefe, fe lebombo ləwə eti nnya boyila bomə léyani wə nɛ.”

⁵³ Ubi anto əmə ákloma nkə lefe nəmfo əsuə tutuutu Yesu ləteyi wə nkə, “Fə ubi əmə ebəkə nkpə.” Nya uninə əmfo ku wə diyə eto betidi kenke léfo Yesu bánə.

⁵⁴ Nyamfo díyifo ayanisa nuəfə nnya Yesu díyifo lə Galilea se utsyi Yudea eto kasə úsu mfó nɛ.

5

Yesu Átsya Ufimfi Utsyuə Lə Ditumbu Ditsyuə Óflə.

¹ Lə nyamfo eto kamaa, Yesu ésu Yerusalem se Yudafo eto diyisɛɛ ditsyuə didife léyo. ² Lə umə əmə eto kaka baakpo Basamu eto Kesie óflə, ditumbu ditsyuə kpe mfó nə baakpo bə Betesda lə Hebrifo eto sele əsuə. Bákpə mpatampa ɛnə beńyənsə lə ditumbu nəmə óflə.

³ Mfó befimfi kpə ateate ba ni bənəmba, mba letsyini, ku mba leba bankpoo kasə díbə kakpo. Nya beńyə bensekə ntu bomə eto butinkəsə butsyuə. ⁴ (Itsyise afe ətsyuəə, Onanto eto ɔtənkpe utsyuə kəbə kémunisə ntu bomə. Nya ufimfi tute wə ke dídufə lə ntu bomə əsuəə, ənyə bufitsyantsya.) ⁵ Osani utsyuə kálabə mfó wə díkəfi alɛ fosi ətsyə alɛ mflamfla sɔ̃ɔ̃.

⁶ Se Yesu dínyə wə nya unyi nkə onlabe lə

ufinkla əsue mfó itə ale kpəə, ótə wə nkə, “Ala bə, fə bufi ye fə?”

⁷ Ufimi əmə etə mbuaye nkə, “Uninə, mimbə kuutsyuə wə ləwunsəko mə ndufə ntu bomə kafo lə bəmunisə mu. Lə nkplatsya miə meedufə tsyaa, utidi bamba éboka mə budufə koko.”

⁸ Yesu átəyi wə nkə, “Taka ənyə, fi fə okla lə aye edu!” ⁹ Lamfolamfo, osani əmə eto əsue əmuə wə ale! Úfi wə okla nya óye údu.

Diyi nə nyamfo díbəə, eyifo Yudafə eto Ɖnweditsyəyi. ¹⁰ Nyaso Yudafə eto beninə átəyi osani wə Yesu létsya bufi bənkə, “Mmi eyifo Ɖnweditsyəyi. Kofi məntə kusu bə lə etsyi fə okla.”

¹¹ Ótəyi nkə, “Nwə létsya mə bufi ke letəyi mə nkə, “Taka ənyə, fi fə okla lə aye edu!” ”

¹² Bátə wə bənkə, “Owoe ni utsyə letəyi fə nkə, “Tsyi fə okla lə aye’?”

¹³ Fəə nwə bətsya bufi bomə mánte nkə utsyə əmə ni Yesu. Nya Yesu tsya ébonya údufə lə betidi kpə ba dínyə mfó eto nti.

¹⁴ Nyamfo eto kamaa, Yesu ənyə wə lə Onanto eto kedikətəko nya ótəyi wə nkə, “Bebe! Əsue búmuə fə ale. Nyaso mensiyifo lebuə bio! Lenni nkoo, lesa nə nkpe ale enso mmə ebuyifo fə!” ¹⁵ Nya osani əmə dídu nya úsu ótəyi Yudafə eto beninə bamə nkə Yesu ni utidi wə létsya wə bufi.

¹⁶ Nyaso bétsyiko Yesu bulə, itsyise ótsya utidi bufi lə Ɖnweditsyəyi əsue ¹⁷ Yesu átəyi mə nkə, “Mə Anto si ɔle keyifo buyifo lefe saa, nyaso ele bə mintsya yifo nko.”

¹⁸ Lə nnya ótəyi mfo esoo, Yudafo eto beninə esi bábebe esu keklege bæ baalo wə. Itsyise inni Ɔnweditseyəyi əsuə eto kɔfi ete óta úbu, bomu usi ótəyi nkə Onanto eyifo wə Anto. Nya nyamfo eto kasɔ ni bæ wə ku Onanto akate.

Yesu Eto Əsuəale

¹⁹ Mfó nya Yesu letəyi mə nkə, “Nlɛ mi bətəyi sitinti minkə, Onanto eto Ubi embofo kulesa buyifo lə wə kosate eto əsuəale əsuə. Bomu lesa nə wəənyə wə Anto leeyifoo, ni wintsya leeyifo nɛ. ²⁰ Itsyise Anto əmə aala wə Ubi əmə nya woate wə lesa saa nə wə kosate nlɛ buyifo. Nya woote wə asa kplɛ kpə enso nyamfo nnya luuyifo mimblɛ yanii. ²¹ Fɛ kase Anto əmə laatakasə bəkpɛnkpɛ ketsyiko ɔkɔmə kaboko nkprə, nko ke Ubi əmə tsya luutə nkprə mba úləkə nɛ. ²² Nya Anto əmə kosate tsya ankponko kuutsyuə lekpo, bomu útə wə Ubi kusu nkə okponko betidi kenke lekpo, ²³ bæ lə utsyuə saa lə ufi dibu utə Ubi əmə fe kase bəətə Anto əmə dibu. Futsyɛ kee dímembu Ubi əməə, mémbu Anto əmə létsyese wə tsya.

²⁴ “Nlɛ mi bətəyi sitinti minkə, utsyuə saa wə laanɔ mə ditiki nya ófo nwə létsyese mə ónɔɔ, wuunyə nkprə manlo. Bembokponko wə lekpo, fɛɛ óyɛ lə ukprə əsuə ófɛ údufə lə nkprə əsuə koko. ²⁵ Nlɛ mi bətəyi sitinti miə, lefe lə bubə nə bekpɛnkpɛ luutsyue Onanto eto Ubi koto, nya mba leetsyue wɛ ɔkɔɛ koto ebunyə nkprə tinti. Lefe nəmə kulaatsya ébubə koko. ²⁶ Fɛ kase Anto əmə ni nkprə eto ketsyikoko,

nko ke útə nkə wə Ubi tsya yifo nkpə eto ketsyikokò nɛ. ²⁷ Nya útə wə əsuəale nkə okpronko kawunsiə kenke lekpo, itsyise wə ni Utidi Eto Ubi əmə.

²⁸ “Biəntə lə nyamfo lə iyifo mi yanii, itsyise lefe lɛ bubə nə bekrənkpə ba nkpe lə edi lɔɔɔ Utidi Eto Ubi əmə eto ɔkɔɛ. ²⁹ Nya bɔɔbɔ lə edi bəbə. Mba dísíə nkpə sɛɛ ebotaka bənyə nkpə manlo. Nya mba dísíə nkpə bua, tsya ebotaka bafo dikpilolo.

³⁰ “Məmbɔfo kulesa buyifo lə mɔ əsuəale əsuə. Lesa nə Onanto laatɛyi mɛɛ, nnya meefi kakpo lekpo nɛ. Nyaso mɔ lekpokpronkpo yɛ lə kusu əsuə, itsyise meenyifo kulesa lə mɔ lelabi əsuə, bomu lə nwə létsyese mə eto lelabi əsuə.”

Yohanes Ɛləkə Yesu Kɛnyɛ.

³¹ Yesu esi ótɛyi nkə, “Lə nləkə kɛnyɛ lə mɔ kosate əsuəə, yanle bə bafo lesa nə míntɛyi əmbə kalende. ³² Fɛɛ utidi bamba kpe wə leedi adansiɛ lə mɛ əsuə, nya nyi miə adansiɛ nnya ɔnlɛ budi lə mɛɛ, kpe kalende.

³³ “Bíokpe batɔnkpe Yohanes ɔflo nya úkatɛyi mi sitinti siamə itsyi lə mɛ əsuə. ³⁴ Fɛɛ mɔɔ, minlɛ bɔtɛyi miə utidinini eto sedansiɛdidi lə mɛ əsuə afe itə mɛ. Bomu ńtɛyi nyamfo bə lə binyə bofokətə. ³⁵ Yohanes ətsyə fe okandiɛ wə nlɛ bunyə nya ɔnlɛ lekpasə butə, nya béla biə biənyə disuəyue lə wə lekpasə nəmə əsuə itə lefe sɛkɛ ete.

³⁶ “Fɛ mɔɔ, sedansiɛ sia lɛflo senso Yohanes eto selee, se nkpe mɛ nɛ. Itsyise keyifo ka mɔ Anto dítə mɛ nkə nyifo nlose, ka minlɛ buyifoo,

ke nle adansie budi læ mæe næ. Ke nle bote bæ mɔ Anto əmə létsyese mæ. ³⁷ Nya Anto wə létsyese mæ tsyaa, wə kosate leedi adansie læ mæ əsuə. Bíannɔ tɔ wə ɔkɔe bənɔ, nya bíənyə tɔ kase unte bínyə. ³⁸ Fæe biamfo wə ditiki nəmə kakpe læ mi akɔesi itsyise biamfo utidi wə ótsyese bənɔ. ³⁹ Biakase Awɔnisa Kenkə eto Kukue eto asa itsyise bibu biə biunyə nkpe manlo læ nnya əsuə. Nya ko etiki nyamfoo, læ etiki budi ketsyi læ mæ əsuə! ⁴⁰ Fæe beni biə biembubə mæ ɔflo læ binyə nkpe.

⁴¹ “Minlə kasɔ mfo eto betidi eto atəsə bɔbɔbɔ, ⁴² itsyise nyi betidi ba eto okle bini, nya nyi miə bianla Onanto læ mi akɔesi. ⁴³ Mbə læ mɔ Anto eto diye əsuə, fæe biamfo mæ. Nya læ utidi bamba ebubə læ wə kosate eto diye əsuə alæe, biofo wə. ⁴⁴ Ntsyə yuubə fə biofo mæ bənɔ læ lefe nə eto lefe benlə atəsə bɔbɔbɔ ketsyiko mi bətsyuə ɔflo, nya biambɔbɔe atəsə nnya ditsyi Onanto ɔni kplo əmə ɔflo?”

⁴⁵ “Fæe biembu biə mɔ ni nwə loolo mi dikpi læ mɔ Anto ɔflo. Bomu Moses, nwə əsuə bífi mi kusubebe bítekə, wə ni futsyə loolo mi dikpi næ. ⁴⁶ Lə nnya ete béfo Moses bənɔ sitintii, eni béfo mæ bənɔ, itsyise ówɔni asa utsyə itsyi læ mæ əsuə. ⁴⁷ Fæe se bíamfo lesa nə ówɔni utsyə bənɔ, ntsyə yuubə fə biofo lesa nə maatəyi bənɔ?”

6

Yesu Etə Betidi Akpi Anɔ Lesa Bédi.

¹ Nyamfo eto kamaa, Yesu áyila Galilea eto Ditumbukplə nə bensi baakpo bæ Tiberia eto

Ditumbukple úsu ni lekpake nə nse. ² Nya betidi kpə dítəkəko wə, itsyise bənyə ayanisa nnya úyifo ótsya mba nle bufi eso. ³ Yesu ku wə bakasebi ábe bésu bəsiə lə lekpenkpe ditsyuə əsuə. ⁴ Lefe nə Yudafo leedi Ukpe Ása Bo Óyila eto Diyi éboyo elo.

⁵ Se Yesu létakasə ənəmi únyə sitiditu kple sia nle wə oflo bubəə, óto Filipino nkə, “Sieti buunyə didisa boya butə betidi bamfo kenke lə bedi?” ⁶ Fɛɛ Yesu áto nyamfo nkə lə ufi oto Filipino obe, ite bə uyi lesa nə wə kosate ləəbə buyifo tsya fɛ.

⁷ Filipino ətə wə mbuayɛ nkə, “Lə bufi betidi alofa ənuə eto diyi eto kayofofɔ eto atabi boya didisa kulaa tsyaa, diemboyo bə betidi bamfo eto utsyuə saa nyə sɛkɛ udi!”

⁸ Mfó nya Yesu eto okasebi wə ni Simon Petro, eto oyimi wə baakpo Andrea, ləteyi wə nkə, ⁹ “Okosobi utsyuə si mfo wə ntsyi abolo anɔ ku akpɛ ənuə. Fɛɛ bə ni nyamfo itə betidi ba kpenkpe mfo?”

¹⁰ Yesu áteyi mə nkə, “Bitə lə betidi bamə lə bəsiə lə kasɔ lə kaka lékpa wuee.” Nyaso betidi bamə kenke əsiə lə kasɔ. Basani mate eyifo fe akpi anɔ. ¹¹ Nya Yesu difi abolo nyamə, nya óso Onanto ani nya úsie nnya útə betidi bamə nsi mfó. Nko ke úyifo ku akpɛ nyamə tsya nɛ, nya mə utsyuə saa lɛkɛ kase óla.

¹² Se bédi bémii, Yesu áteyi wə bakasebi bamə nkə, “Bəsɛ nnya díbu, bə lə ku ni ditsyuə saa lə lɛyɛ bobia.” ¹³ Nyaso básɛ nnya díbu bakɔ. Nya nnya díbu lə abolo anɔ nnya bédi əsuəə, éyi lefosi etsyitsya ənuə.

14 Se betidi bamə dínýə ayanisa nnya Yesu dýifoo, bátèyi bənkə, “Sitinti nwə mfo ni Onanto eto Unyeləkətidi wə luubə kawunsie nɛ!” 15 Nya, Yesu áte nkə bəəbə wə bubə kəmuə lə əsuəale əsuə kətsyə seka. Itə eso úləkə əsuə lə mə nti úsu ɔkɛ lə akpenkpe nnya nkpe mfó nti wə mate.

Yesu Áyɛ Lə Ntu Əsuə.

16 Se ditsyitsyo lefe léyoo, Yesu eto bakasebi áyifə bésu ditumbukplɛ nemə kɛnyɛ. 17 Bédufə lə ɔklɔ utsyuə əsuə nya bétisyiko ditumbukplɛ nəmə bɔyila kesu Kapernaum eti. Kale ébolo, tsya fɛɛ Yesu məmbə óyotɔ mə ɔflɔ. 18 Ditumbukplɛ nəmə eto ntu étsyiko bonwa ketu flɛmflɛmfɛ, itsyise ufiebi étsyiko bɔsɔ kɛkɛkɛ. 19 Bakasebi bamə ébonwa ɔklɔ əmə báyɛ fɛ esunkpo ətsyə nye ana ku kama fɛ bənyə se Yesu nye lə ntu bomə əsuə ɔnlɛ ɔklɔ əmə ɔflɔ bubə. Se bənyə wəə, sikpi ko dímuə mə! 20 Nya Yesu letɛyi, mə nkə, “Biante sikpi! Mɔ uni.” 21 Mfó fɛ əsuə diyuə mə nɛ! Nya bətə údufə lə ɔklɔ əmə nya ete bédufə kaka bántɔ tsya nɛ.

22 Se kale dísiəə, betidi ba díbu bənyə lə ditumbukplɛ nəmə eto situma sia nsee, ənyə bətsyə lekpo bə diyi nə léfee, ɔklɔ ɔni hã dínýə lə utufɔ mfó. Báte bə Yesu méndufə lə ɔklɔ əmə əsuə ku wə bakasebi fɛ bétisyiko ditumbukplɛ nəmə bɔyila. Bakasebi bamə mate ete dídufə lə ɔklɔ əmə kafo. 23 Nya efue bamba nnya ditsyi Tiberia eto umə əbə ídufə kaka dímantsonko kaka bédi abolo, se

Bonamute lékasɔ Onanto ani ólosɔ eto kama.
²⁴ Se sitiditu nɛmɛ dínɔyɛ nkɛ Yesu nye wɛ bakasebi mankɛ mfó esoo, bédufɛ lɛ efue nyamɛ nya bédú bésu Kapernaum bésu banlɛ Yesu bɔbɛbɛ.

Yesu Ni Didisa Nɛ Lɛtɛ Nkpɛ.

²⁵ Se betidi bamɛ dínɔyɛ Yesu lɛ ditumbukplɛ eto lekpake nɛ nsee, bátɔ wɛ bɛnkɛ, “Oteasa, dimamfɛ fɛbɛ mfɔ?”

²⁶ Yesu ɛtɛ mɛ mbuayɛ nkɛ, “Nlɛ mi bɔtɛyi sitinti minkɛ, inni ayanisa nnya bínɔyɛ mínɔyɛ bɛnɔ kasɔ eso bɛnlɛ mɛ bɔbɛbɛ, bomu lɛ didisa nɛ bɛkɛ bídi bími eso. ²⁷ Biankplatsya itɛ didisa nɛ laabia, bomu bekpplatsya itɛ didisa nɛ lambia, nɛ luutsyɛ itɛ nkpɛ manlo. Didisa nɛmfɔ, ni ni nɛ Utidi Eto Ubi luutɛ mi nɛ, itsyise Anto Onanto ébutɛkɛ wɛ kɔni utsyɛ.”

²⁸ Mfó nya betidi bamɛ lɛtɔ Yesu bɛnkɛ, “Be ele bɛ buyifo lɛ ete bɛ bɔlɛ Onanto eto keyifo buyifo?”

²⁹ Yesu ɛtɛ mɛ mbuayɛ nkɛ, “Lesa nɛ Onanto lela nkɛ biyifo ni bɛ befo utidi wɛ ótsyese bɛnɔ.”

³⁰ Bátɔ wɛ bɛnkɛ, “Nte ayanisa nnya fuuyifo ate bo, bɛ lɛ bofo fɛ bɔnɔ? Be fuuyifo? ³¹ Bo banamɛ édi didisa nɛ baakpo mana lɛ mfiminti fe kase báwɔni bɔtsyɛ lɛ Awɔnisa Kɛnkɛ eto Kukue ɛsuɛ bɛnkɛ, ‘Útɛ mɛ didisa nɛ dítsyi kato nkɛ bedi.’ ”

³² Mfó nya Yesu lɛtɛyi mɛ nkɛ, “Nlɛ mi bɔtɛyi sitinti minkɛ inni Moses ni nwɛ díte mi didisa nɛ dítsyi kato. Bomu mɔ Anto ni nwɛ lɛtɛ mi didisa tinti nɛ dítsyi kato. ³³ Itsyise Onanto eto

didisa ni nwə ditsyi kato úbə. Wə ni nwə lətə nkpə kawunsia nɛ.”

³⁴ Bátəyi wə bənkə, “Bonamute, tə bo didisa nəmfo lefe saa.”

³⁵ Mfó Yesu lətəyi mə nkə, “Mɔ ni didisa nə lətə nkpə nɛ. Fəə ke díbə mɔ ɔflo, kukpense əmbɔle fə kulefe, nya nwə léfo mə ɔnɔ, utukue əmbɔle wə kulefe kulefe. ³⁶ Fɛɛ ntəyi mi minkə ite bə bíunyə mə tsyaa, bíamfo mə bɛnɔ. ³⁷ Utsyuə saa ke mɔ Anto əmə dífi útə mɛɛ, ebubə mə ɔflo, nya nwə díbə mə ɔflo, məmbɔni wə kulefe. ³⁸ Itsyise ntsyi kato mbə inni bə lə nyifo lə mɔ lelabi əsue, bomu mbə miə lə nyifo lə nwə létsyese mə eto lele əsue. ³⁹ Nya utidi wə létsyese mə eto lelabi ni nkə mba kenke úfi útə mə eto kutsyuə mannya, bomu bə lə ntakasə mə nńyənsə lə diyi fɛfɛ əsue lə məmblɛ kenke lə bənyə nkpə manlo. ⁴⁰ Itsyise mɔ Anto eto lelabi ni nkə, utsyuə saa wə dínyə mɔ Onanto eto Ubi nya ófo mə ɔnɔ, lə unyə nkpə manlo, nya mootakasə wə nńyənsə lə diyi fɛfɛ əsue.”

⁴¹ Mfó nya Yudafɔ bamə dítsyiko bɔwɔnɔnɔ lə wə əsue itsyise ɔtəyi nkə, “Mɔ ni didisa nə ditsyi kato díbə” eso. ⁴² Nyaso bátɔ mə əsue bənkə, “Inni Yesu əmfo wə ni Yosef eto Ubi lee? Buyi wə anto ku ambe. Ntsyə ibə fɛ woatəyi nkə, utsyi kato úbə?”

⁴³ Yesu átəyi mə nkə, “Bɛyɛ kənə lə mi nti. ⁴⁴ Kuutsyuə embofo mə ɔflo bubə lenni mɔ Anto əmə lékpa wə óboko mɔ ɔflo. Nya mootakasə wə mboko nkpə lə diyi fɛfɛ əsue.

⁴⁵ Onanto eto bənyeləkətidi áwɔni bənkə,

‘Onanto ebote mɛmblɛ kenke asa.’ Nyaso ut-syuɛ saa wɛ leetsyue ato nya woakase asa ket-syi lɛ Anto ɛmɛ ɔflɔɔ, ɛɛbɛ mɔ ɔflɔ. ⁴⁶ Nyamfo mante bɛ utsyuɛ ɛbunyɛ Anto ɛmɛ unyɛ enso nwɛ ditsyi Onanto ɛmɛ ɔflɔ hã dɪkɛnyɛ wɛ unyɛ. ⁴⁷ Nlɛ mi bɔtɛyi sitinti minkɛ nwɛ lefo ɔɔɔɔ, nkpɛ manlo kpe wɛ. ⁴⁸ Mɔ ni dɪdɪsa nɛ lɛtɛtɛ nkpɛ. ⁴⁹ Mi banamɛ ɛdi lesa nɛ baakpo mana lɛ mfiminti, fɛɛ bekpɛ. ⁵⁰ Fɛɛ didisa nɛ ditsyi kato dɪbɛ, eyifo didisa nɛ utsyuɛ saa ke leedi nii, embukpɛ. ⁵¹ Mɔ ni didisa nɛ lɛtɛtɛ nkpɛ, nɛ dɪtsyi kato dɪbɛ. Utsyuɛ saa wɛ leedi lesa nɛmfoo, wuusɪ nkpɛ lefe saa. Nya didisa nɛ muufi ntɛ kawunsɪ ɛto betidi bɛ lɛ bɛnyɛ nkpɛ, eyifo mɔ ɛsuɛ ɛto sinɛ sia muumfi ntɛ.”

⁵² Nyamfo ɛboko kɛnɛ kekɛɛ lɛ Yudafɔ bamɛ nti nya bɔtɔ bɛ, “Ntsyɛ utidi ɛmfo loofɔ wɛ ɛsuɛ ɛto sinɛ bufi kɛtɛ bo nkɛ budi?”

⁵³ Mfɔ nya Yesu letɛyi mɛ nkɛ, “Nlɛ mi bɔtɛyi sitinti minkɛ, lɛ biendi mɔ Utidi Eto Ubi ɛto ɛsuɛ ɛto sinɛ, binɛ mɔ kɔtɔɔ, biembunyɛ nkpɛ lɛ mi ɛsuɛ. ⁵⁴ Utsyuɛ saa ke leedi mɔ ɛsuɛ ɛto sinɛ nya wɛnɛ mɔ kɔtɔɔ, ebunyɛ nkpɛ manlo, nya mootakasɛ wɛ mboko nkpɛ, lɛ diyi fɛfɛ ɛsuɛ. ⁵⁵ Itsyise mɔ ɛsuɛ ɛto sinɛ ni didisa tinti nya mɔ kɔtɔ ni ɛnɛsa tinti. ⁵⁶ Utsyuɛ saa ke leedi mɔ ɛsuɛ ɛto sinɛ nya wɛnɛ mɔ kɔtɔɔ, okpe lɛ mɛ, nya mintsya nsi nkpɛ lɛ wɛ. ⁵⁷ Fe kase Anto wɛ nsi nkpɛ lɛ mɛ nya minsi nkpɛ lɛ wɛ, nko ke utidi wɛ leedi mɔ ɛsuɛ ɛto sinɛ, luusɪ nkpɛ ɛyɛ lɛ mɛ eso nɛ. ⁵⁸ Nyamfo ni didisa nɛ ditsyi kato dɪbɛ. Dinte fe didisa nɛ ɛto okɛ mi banamɛ dɪdi nya bɛkpɛ. Utsyuɛ

saa kee leedi didisa nə maateyi mfoo, ebusiə nkpə itə lefe nəmə kenke.” ⁵⁹ Asa nyamfo Yesu léte mə lə Yudafə eto katsyakə lə Kapernaum nɛ.

Nkpə Manlo Eto Etiki

⁶⁰ Se Yesu eto bakasebi kpə lenə etiki nyamfoo, báteyi bənkə, “Ditiki nəmfo eto kasənənə kpe ale tinti! Owoe loofə ni bofo?”

⁶¹ Ite bə mə kuutsyuə mémfe kénye óteyi kulesa tsyaa, Yesu áte nkə íkələ mə lə akɔəsi nya ótə mə nkə, “Nyamfo ələ mi? ⁶² Nyalɛ, lə ibə bə binyə Utidi eto Ubi əmə ɔntə kato kaka usiə kɔɔ, ntsyə biuyifo? ⁶³ Onanto eto Lɛwɔnə Kenkə ləətə nkpə. Utidi eto əsuə eto sinə əmbə kutəkə saa. Etiki nnya kenke mínteyi eyifo Onanto eto Lɛwɔnə eto etiki nnya ləətə nkpə. ⁶⁴ Fɛɛ bətsyuə kpe lə mi nti ba dímamfo bánə.” Yesu áte taa kaso ketsyikokə mba dímamfo wə bánə ku nwə luufi wə okpe kɔni. ⁶⁵ Óteyi úsukosə nkə, “Nyamfo eso mínteyi mi miə kuutsyuə saa embofo mə oflɔ bubə lenni Anto əmə díte wə kusu.”

⁶⁶ Lə nyamfo eto kamaa, mba dítekəko wə kpə ésinkli lə wə kama nya bəkətəkəko wə kama bio.

⁶⁷ Mfó nya Yesu létə wə bakasebi lefosi inuə bamə nkə, “Mi tsyaa, biusinkli mə kama?”

⁶⁸ Simon Petro ətə wə mbuayɛ nkə, “Bonamute, owoe oflɔ buudu busu? Fə nkpe nkpə manlo eto etiki nyamə! ⁶⁹ Nya mɔmɔɔ, bófo bóno nya bunyi boə fə ni Onanto eto Ubi, wə ni Ókenkenyə əmə.”

⁷⁰ Mfó nya Yesu díte mbuaye nkə, “Mɔ ni nwə díləkə mi lefosi inuə bamə tsyaa, ɔni eyifo oboatidi læ mi nti!” ⁷¹ Yesu áteyi nyamfo itsyi læ Yuda wə ni Simon Iskariot eto ubi əsuə. Itsyise uyifo bakasebi lefosi inuə bamə eto ɔni wə luufi wə okpe kɔni.

7

Yesu Ésu Yudafɔ Eto Mpatampa Kalɔsiəsiə Eto Diyisɛ Kedikɔ.

¹ Lə nyamfo eto kamaa, Yesu ésu óye læ Galilea eto kasɔ, nya wánla nkə weesu Yudea eto kasɔ itsyise Yudafɔ akabebe kusu læ balo wə eso. ² Lefe nəmfoo, Yudafɔ eto Mpatampa Kalɔsiəsiə eto Diyisɛ nəmə éboyo. ³ Nyaso Yesu eto bayimisani áteyi wə nkə, “Du mfo læ esu Yudea eto kasɔ læ fə bakasebi læ bənyə asa nnya fanlə buyifo. ⁴ Itsyise utidi wə laala nkə bate wəə, enyifo asa kakula. Se fanlə asa nyamfo buyifoo, ləkə nnya ate kawunsie kenke læ betidi læ bate fə!” ⁵ Báteyi wə nko itsyise wə bayimisani kulaa tsya mámfo wə bánɔ.

⁶ Yesu áteyi mə nkə, “Mɔ lefe mányo tɔ. Fɛɛ mii, lefe saa alɛkɛ itə mi. ⁷ Kawunsie embofo mi bukisi. Fɛɛ mɔɔ, keekisi mə itsyise nle buləkə kate minkə ke asayifoyifo eyi ku abuyifoyifo. ⁸ Mii, bisu diyisɛ nəmə kedikɔ. Mɔɔ, membusu diyi nəmə kedikɔ itsyise mɔ lefe mányo tɔ.” ⁹ Se óteyi mə nyamfoo, ótsyime ɔkɛ læ Galilea mfó.

¹⁰ Fɛɛ se wə bayimisani bamə dídu bésu diyi nəmə kedikɔ eto kamaa, Yesu tsya ésu mfó, fɛɛ

wənləkə wə əsuə ote, ókula əsuə. ¹¹ Yudafɔ eto beninə ákabɛbɛ wə lə diyisɛɛ nəmə kedikɔ ákatɔ bə, “Sieti osani əmə nkpe?”

¹² Betidi kpə lə sitiditu nəmə nti ékedi etiki kawɛkawɛ lə Yesu əsuə katɛyi bənkə, “Uyifo utidi sɛɛ.”

Nya bətsyuə tsya díkatɛyi bənkə, “Owo lo! Ɔlɛ betidi bɔwɛ kakpe kanyansə!” ¹³ Fɛɛ se banlɛ Yudafɔ sikpi bote esoo, kuutsyuə mámfo nnya buləkə katɛyi lə betidi lə banɔ.

Yesu Áte Asa Lə Diyi Nəmə Kedikɔ.

¹⁴ Se diyisɛɛ nəmə didi eto eyi leyo ni ntinti etii, Yesu ésu Yudafɔ eto Disumuyo nya úsu óte asa mfó. ¹⁵ Wə asatete nyamə éyifo Yudafɔ bamə yanii, nya bátɛyi bənkə, “Sieti okosobi əmfo ditsyi ku kobe komfo eto okle, se wénsu asa kakasekɔ lə kukalebe saa?”

¹⁶ Mfó Yesu ditə mbuayɛ ótɛyi mə nkə, “Mɔ asatete méntsyi mə kosate ɔflo. Bomu itsyi Onanto wə létsyese mə ɔflo. ¹⁷ Utidi wə laala nkə weeyifo Onanto eto lelábii, ebote lə asa nnya maate etsyi Onanto ɔflo lee, mə kosate eto əsuəale əsuə maate nnya. ¹⁸ Utidi wə leedi etiki itsyi lə wə əsuəale əsuəə, wə əsuə eto atɛsə waabɛbɛ. Fɛ, utidi wə laala nkə waatɛsə nwə létsyese wəə, weeyifo asa kayenko lə sitinti əsuə nya waantɛyi sidia. ¹⁹ Inni Moses ni nwə díte mi kɔfi komə lee? Fɛɛ mi kuutsyuə entsyue kɔfi komə koto. Beso bela biə bialo mə?”

²⁰ Mfó sitiditu siamə díte wə mbuayɛ bənkə, “Lɛwɔnɔ bua təkəko fə! Owɔe nlɛ bola nkə waalo fə?”

21 Yesu ətə mə mbuayɛ nkə, “Ayanisa ani nyamfo mínyifo nya íyifo mimblɛ tã yanii mmə. 22 Moses ətə mi kɔfi nkə bela mi bebisaibi eto alo. Ite bə inni Moses uni dítsyiko nko, bomu itsyi taa mi bana lefe. Nyaso biala osaibi lelo lə Ɔnwɛditsyɛyi nɛ. 23 Nya lə boofɔ osaibi lelo bola lə Ɔnwɛditsyɛyi əsuə lə kase yembonta Moses eto kɔfi ibuu, beso biənyə ɔblo kakpe mɛ biə ntsya utidi wə nɛ bufi, úmuə ale kenke lə Ɔnwɛditsyɛyi əsuə? 24 Biemfi ənyənsa bekpo lekpo! Bomu bekpo etiki eto lekpo ɛyɛ lə sitintisu əsuə.”

Betidi Áto Bánɔ Lə Yesu Ni Utidi Wə Bákpo Ɔhile Bətsyə Ɛmə.

25 Betidi bətsyuə ba dítsyi Yerusalem áto bə, “Inni utidi əmfo banɛ bəbɛbɛ bə baalo? 26 Bebe wə! Ɔlɛ etiki budi lə obianti, nya bántɛyi wə kulesa! Lee, bote bákate sitinti biənkə wə ni Nwə Onanto Lékpɔ Ɔhile Utsyə əmə? 27 Lə Nwə Onanto Lékpɔ Ɔhile Utsyə əmə əbəə, kuutsyuə saa embote kaka utsyi úbə. Fɛɛ utidi əmfo alɛɛ, bomblɛ yi kaka utsyi úbə.”

28 Lefe nə Yesu díkate asa lə Disumuyo mfóo, ófa bembembe óto nkə, “Inni biənkə biyi mɛ sitinti ku kaka mintsyii? Məmbə mfo lə mɔ əsuəale əsuə! Nwə létsyese mɛɛ, waantɛyi sidia. Nya mii, binyi wə. 29 Fɛɛ mɔɔ, nyi wə, itsyise intsyi wə ɔflo nya wə ni nwə létsyese mɛ.”

30 Nya bákplatsya bə bəmuə wə. Fɛɛ mə kuutsyuə saa mámfo wə butidi, itsyise wə lefe

mányo tɔ. ³¹ Fɛɛ kpɛ lə mə nti áfo wə bánɔ nyaso báto bənkə, “Nya lə Nwə Onanto Lékpɔ Ɔhile Utsyə díbəə, uteyifo ayanisa ote enso nnya utidi əmfo díkeyifoo?”

Batsyese Mba Laase Disumuyo Bə Bəmuə Yesu.

³² Farisifo bamə áno se sitiditu siamə nle etiki nyamfo boteyi lə kawɛ lə mə nti lə Yesu əsuə, nyaso mə ku besumunyə ninə átsya nya batsyese kedikətəkɔ eto mba laase mfo bə besu bəmuə Yesu baboko.

³³ Yesu áteyi mə nkə, “Nsi mɔkɛ mi lenti itə lefe kliminti ditsyuə ete muusinkli nsu nwə letsyese mə ɔflo. ³⁴ Biɔbɛbɛ mə, fɛɛ biembunyə mə, itsyise kaka mɔkɛɛ, biembofo mfó bubə.”

³⁵ Ete Yudafo eto beninə letɔ mə əsuə benkə, “Sieti nwə mfo laala nkə weesu fɛ boembunyə wə? Lee, bubu ɔnlɛ nkə weedu usu Helafɔ eto kəmə ka bo betidi nkpe bə lə ote Helafɔ bamə asa mfóo? ³⁶ Nnya ɔnlɛ boteyi nkə, ‘Biɔbɛbɛ mə, fɛɛ biembunyə mə,’ nya ‘Kaka mɔkɛɛ, biembofo mfó bubəə,’ eto kasɔ ni be?”

³⁷ Lə diyi fɛfɛ nə ni diyi nə nso bofe lə diyididi nəmə əsuəə, Yesu átaka únyə nya óbesə ɔkɔɛ kato óteyi nkə, “Lə utukue lɛ utsyuəə, utsyə əmə bə mɔ ɔflo lə ubə unə ntu. ³⁸ Fɛ kase báwɔni bákpɛ lə Awɔnisa Kenkɛ eto Kukue əsuə bátɛyi bənkə, ‘Utidi wə léfo mə ɔno, ketukplo ka ləətə ntu bo ləətə utidi ləəsiə nkpe eto ntuu, ebɔbɔdi butsyi lə wə utu kəmiə.’ ” ³⁹ Yesu áteyi nyamfo itsyi lə Lɛwɔno nə mba léfo wə bánɔ lofo əsuə. Itsyise éyo lefe nəmfoo, bəntə tɔ Lɛwɔno nəmə, se bántakasə

tɔ Yesu betsyiko ɔkɔmɛ báboko wɛ diyɛnde esuɛ eso.

⁴⁰ Se betidi bamɛ lenɔ etiki nyamfoo, bátɛyi benkɛ, “Sitintii, utidi ɛmfo eyifo Onanto eto Unyeləkɛtidi ɛmɛ.”

⁴¹ Babamba tsya átɛyi bɛnkɛ, “Nwɛ mfo ni Nwɛ Onanto Lékpɔ Ɔhile Utsyɛ nɛ.”

Fɛɛ mɛ bɛtsyuɛ áɔɔ bɛnkɛ, “Nwɛ Onanto Lékpɔ Ɔhile Utsyɛ, ebofo Galilea butsyi?

⁴² Awɔnisa Kɛnkɛ eto Kukue átɛyi nkɛ Nwɛ Onanto Lékpɔ Ɔhile Utsyɛ ebutsyi Oka David eto kafo lɛ Betlehem eto umɛ kaka Oka David dísiɛ.” ⁴³ Lɛ nnya eso kabakɛfɛ édufɛ lɛ betidi bamɛ eto nti itsyi lɛ Yesu eso. ⁴⁴ Bɛtsyuɛ ala bɛ bɛɛmuɛ wɛ, fɛɛ kuutsyuɛ saa méntidi wɛ.

Yudafɔ Eto Beninɛ Mámfo Yesu Banɔ.

⁴⁵ Se mbalaase Disumuyo eto mba bákpe dísinkli besuu, Farisifɔ ku besumunyɛ ninɛ bamɛ ɔflo, bátɔ mɛ bɛnkɛ, “Beso bíɛmmuɛ wɛ lɛ ɛsuɛale beboko?”

⁴⁶ Mfɔ nya bɛtɛ mbuayɛ bɛnkɛ, “Boanno tɔ kuutsyuɛ saa di etiki fe kase utidi ɛmfo didi kulefe!”

⁴⁷ Farisifɔ bamɛ áɔɔ mɛ bɛnkɛ, “Nyale úflu mi tsyaa, mi nsusu, ɔwɛ mi ókpe? ⁴⁸ Bíɔnɔ tɔ bɛnɔ biɛ beninɛ bɛtsyuɛ nye Farisinyɛ utsyuɛ áfɔ wɛ ɔnɔ? ⁴⁹ Kulefe, kulefe! Ditiditu nɛmfo enyi Moses eto kɔfi eto kulesa. Nyaso Onanto eto ekudi tɛkɛko mɛ!”

⁵⁰ Farisifɔ eto uninɛ ɔni wɛ baakpo Nikodemo, ébusu Yesu ɔflo únyɛ. Ɔtɔ mɛ nkɛ, ⁵¹ “Nyale, bo kɔfi ɛtɛ bo kusu nkɛ bokpronko utidi lekpo bolo wɛ dikpi lefe nɛ eto lefe

boanno tɔ wə kɛnyɛ eto etiki nye batɔ wə lesa nɔ úyifo?”

⁵² Bɛtə mbuayɛ bátɔ wə bɛnkə, “Nyalɛ, fintsya Galileanyə feni? Dufə lə Anantotiki eto Ekue abe, ete ebote fə Onanto eto unyɛlɛkətidi kuutsyuə embɔbɔ utsyi lə Galilea.” ⁵³ (Nya utsyuə saa dídu úsu diyo.)

8

Usio Wə Bəmuə Lə Kusəkpokpo Əsuə.

¹ Fɛɛ Yesu wə édu úsu Nnuəbi eto Eyi eto Kɔtini əsuə. ² Kəsiasə eto olesia tuu, úsinkli úsu Yudafo eto Disumuyo. Betidi bamə kenke əbə bətsyilama wə, nya úsia lə mə nti, útsyiko mə asa bote. ³ Mfóo, kofi eto bateasa ku Farisifo lékpa usio utsyuə wə bəmuə kɔni kɔni lə disənkpo əsuə báboko mfó. Nya bənyənsə wə lə məmblɛ kenke eto ənəmi. ⁴ Bətɛyi Yesu bənkə, “Oteasa, bəmuə usio əmfo kɔni kɔni lə disənkpo əsuə. ⁵ Lə Moses eto kofi əsuəə, ele bə boto wə okle aba bolo,” lə bənyə etiki lə wə, “Ntsyə fanle botɛyi lə nnya əsuə?” ⁶ Bátɔ wə nyamfo bə lə befi bato wə babe lə bayɛ lə nnya əsuə bəmuə wə.

Fɛɛ Yesu əbə kasɔ nya úfi wə lenimi útsyiko asa bɔwɔni lə kasɔnti.

⁷ Nya se bensi bənyə banlɛ wə etiki bɔtɔ, óbesə əsuə kato nya ótɛyi mə nkə, “Mi nti eto nwə dímenyifo tɔ lebuə unyəə, di utute lə oto wə leba.” ⁸ Nya usi úbə kasɔ, ówɔni asa lə kasɔnti ku wə lenimi.

⁹ Se beninè bamè leno nnya nkoo, mèmble kenke édu oni, oni, idu læ beninètidi əsuə. Isi íbu Yesu ku usio əmə mate nsi nyə mfó.

¹⁰ Yesu átakasə əsuə únyə nya óto usio əmə nkə, “Boambe, se báfe? Nyalə, mə kuutsyuə mémbu loolo fə dikpi?”

¹¹ Mfó usio əmə dítə mbuayə nkə, “Owo lo, Bonamute.”

Nyaso Yesu áteyi wə nkə, “Nko ke mintsya læmbolo fə dikpi nə. Nyaso du esu. Fəe mensisu eyifo lehua bio.”

Yesu Ni Kawunsia Eto Diyənde.

¹² Yesu esi údi Farisifo etiki óteyi nkə, “Mə ni kawunsia eto diyənde. Utidi wə ke ntekəko məə, wuunyə diyənde nə lætə utidi nkpə tinti nya wəəmbəyə læ ketuntu əsuə kulefe.”

¹³ Farisifo bamə áteyi wə bənkə, “Alə etiki budi ketsyi læ fə əsuə. Nyaso nnya fanlə bəteyi əmbə kalende saa.”

¹⁴ Mfó nya Yesu læteyi mə nkə, “Owo lo, ite bə nle etiki budi ketsyi læ mə əsuə tsyaa, lesa nə minlə bəteyi kpe kalende, itsyise nyi kaka mintsyi, nya minyi kaka mintə. Fəe mimmii, binyi kaka mintsyi nye kaka mintə.

¹⁵ Mii, kawunsia eto nsusu əsuə nnya biefi kakponko asa lekpo nə, fə məo, mankponko kuutsyuə lekpo. ¹⁶ Fəe læ bə nyifo nkoo, mə lekpokponkpo ebəyə læ sitinti eto kusu əsuə. Itsyise inni mə mate lookpo ni. Bomu Anto wə létsyese məe, əənyə mə kama. ¹⁷ Nya læ mi kəfi əsuəə, báwəni bákpe bə, læ badansie inuə eto kənyə akate læ etiki ətsyuə əsuəə, lesa nə bəteyi kpe kalende. ¹⁸ Məo, meedi adansie læ

lesa nə maateyi əsue, nya mə Anto wə létsyese mə tsya eedi adansiə lə mə əsue.”

¹⁹ Mfó bátɔ wə bənkə, “Se fə anto əmə nkpe?”

Yesu ətə mbuayɛ nkə, “Binyi mə nya binyi mə Anto əmə tsya. Lə bote ete bete məɛ, eni biote mə Anto tsya.” ²⁰ Yesu átɛyi nyamfo lə okokakokɔ se ɔnlɛ asa bote lə Disumuyo nəmə. Fɛɛ kuutsyuə saa məmmuə wə, itsyise wə lefe mányo tɔ.

²¹ Yesu esi ótɛyi mə nkə, “Məəbə budu lə mi ɔflo, nya biɔbɛbɛ mə, fɛɛ biukpə lə mi abua əsue. Nya kaka mintɔɔ, biembofo mfó bubə.”

²² Nyaso Yudafɔ bamə átɔ mə əsue bənkə, “Wə əsue ɔntɔ kalokɔ eso ótɛyi nkə, ‘Biembofo kaka mintɔ bubə lee’?”

²³ Yesu ətə mə mbuayɛ nkə, “Mimii, kasɔ mfo eto betidi bini. Nya məɔ, ntsyi kato. Mi etsyi kawunsiə mfo, fɛɛ məɔ, mentsyi kawunsiə mfo.

²⁴ Nyaso míntɛyi mi minkə biukpə lə mi abua əsue nə. Nya lə biamfo bɛnɔ biə mə ni nwə minii, biukpə lə mi abua əsue sitinti.”

²⁵ Bátɔ wə bə, “Owoe feni?”

Yesu ətə mə mbuayɛ nkə, “Lesə nə míntɛyi mi itsyi taa kasɔ ketsyikokɔɔ, ni əmə ete nə.

²⁶ Nkpe etiki kpə lə mi əsue nnya ele bə mfi nlo mi dikpi. Fɛɛ nwə létsyese məɛ, sitintitidi uni. Nya asa nnya minɔ mintsyiko wə ɔfloɔ, nnya mimfi minlɛ letsya bobɛ kətə kawunsiə nə.”

²⁷ Mfóo, bánno kasɔ bə Yesuu, Anto əmə əsue ɔnlɛ etiki budi ketsyiko. ²⁸ Nyaso ótɛyi mə nkə, “Lə bebesə Utidi Eto Ubi əmə katoɔ,

nyafɛ biote biɛ mɔ ni nwɛ mini nɛ, nya meenyifo kulesa lɛ mɔ ɛsuɔale ɛsuɔ. Bomu lesa nɛ mɔ Anto léte mɛ nkɛ nteyii, ni hã maateyi nɛ. ²⁹ Nwɛ lekpe mɛ kɔtɔ, si ko mɛ. Wóanyani mɔ mate utsyɔ, itsyise meeyifo lesa nɛ læyuɔsɛ wɛ kafo lefe saa.” ³⁰ Nya se óteyi nyamfo mmɛ, betidi kpɛ ba lenɔ óteyi nyamfoo, áfo wɛ bánɔ.

Yesu Ɛlɛkɛ Betidi Ba Ni Abraham Eto Bebi Óte.

³¹ Nyaso Yesu áteyi Yudafo ba léfo wɛ bánɔ nkɛ, “Lɛ biyifo lɛ mɔ asatete ɛsuɔ, ete bɛ biyifo mɔ bakasebi sitinti nɛ. ³² Biote sitinti siamɛ, nya sitinti siamɛ ebutɛ bisie lɛ mi ɛsuɔ ɛsuɔ.”

³³ Báteyi wɛ bɛnkɛ, “Abraham eto beflufu buni, nya bóendi tɔ ndomufɔ butɛ kuutsyuɔ saa tɔ búnyɔ! Ntsyɔ ibɛ fɛ faateyi fɛnkɛ, bootɛ busie lɛ bo ɛsuɔ ɛsuɔ?”

³⁴ Yesu ɛtɛ mɛ mbuaye nkɛ, “Nlɛ mi bɔteyi sitinti minkɛ utsyuɔ saa ke leeyifo lebuua, uyifo ndomunyɔ utɛ lebuua. ³⁵ Ndomunyɔ aamfiani oyobi wɛ nkpe kedikɔ kulefe. Bomu oyosate eto ubii, wɛ kpe kedikɔ lefe saa.

³⁶ Nyaso lɛ mɔ Onanto eto Ubi ɛtɛ kusu nkɛ bisie lɛ mi ɛsuɔ ɛsuɔ ɛsuɔ, ete bɛ bisi lɛ ɛsuɔ ɛsuɔ sitinti nɛ. ³⁷ Nyi miɛ Abraham eto bebi bini. Fɛɛ bela biɛ bialo mɛ, itsyise biamfo asa nnya maate mi bɛnɔ, eso. ³⁸ Lesa nɛ mímfɔ mintsyiko mɔ Anto ɔflɔ, ni maateyi nɛ. Nya mi tsyaa, lesa nɛ bɛnɔ bitsyiko mi anto ɔflɔ, ni bɛnlɛ buyifo nɛ.”

³⁹ Yudafɔ bamə áteyi wə bənkə, “Abraham ni bo anto.”

Yesu áteyi mə nkə, “Lə Abraham eto bebi bini sitintii, eni biuyifo asa nnya Abraham díyifo seka. ⁴⁰ Fɛɛ bela biə bialo mɔ nwə laateyi mi sitinti sia míno mintsyiko Onanto oflo. Abraham ményifo nko. ⁴¹ Asa nnya mi anto kosate díyifoo, nya benle buyifo nɛ.”

Mfó báteyi wə bənkə, “Bunni basonobi! Anto ɔni nkpe bo, wə ni Onanto!”

Yesu Eləkə Betidi Ba Ni Balo Eto Bebi Ote.

⁴² Yesu áteyi mə nkə, “Lə Onanto ete ni mi antoo, eni biala mɛ. Itsyise Onanto oflo míntsyi mímbə mfo. Inni mɔ kosate eto lelabi əsue mímbə. Bomu wə ni nwə létsyese mɛ. ⁴³ Ntsyɛ eso bianno lesa nə minle mi bɔteyi kaso? Nnya ni bə bianla biə bianɔ ditiki nə minle mi bɔteyi. ⁴⁴ Mi anto Obonsam eto bebi bini, nya bela biə bieyifo wə lelabi. Idu taa kaso ketsyikokɔɔ, uyifo nwə laalo betidi. Nya woanla ditiki tinti nəmə itsyise wanteyi sitinti kulefe. Lə ɔteyi sidiaa, wəeləkə wə ditsyəbi kate. Itsyise nwə laateyi sidia uni, nya wə ni bidia kenke eto anto. ⁴⁵ Fɛɛ mɔɔ se ini sitinti maateyi mi esoo, biamfo mɛ kanɔ. ⁴⁶ Mi nti eto owoe lofo mɛ dikpi bolo nkə nyifo lebuə? Lə nteyi mi sitintii, beso biamfo mɛ kanɔ? ⁴⁷ Utidi wə ni Onanto eto olee, aano Onanto eto etiki. Nnya eso bianno Onanto eto etiki ni bə binni wə bale.”

Yesu Eləkə Asa Nnya Óte Kaso Óte Yudafɔ.

⁴⁸ Yudafɔ áto Yesu bənkə, “Lə bɔteyi boenkə Samarianyə feni nya lewɔnɔ buə təkəko fəə, bɔteyi sidia?”

⁴⁹ Yesu ətə mə mbuayɛ nkə, “Lɛwɔnɔ bua saa ɛntəkəkɔ mɛ. Nlɛ mɔ Antɔ dibu butə, fɛɛ mi ɛntə mɛ dibu. ⁵⁰ Mɔɔ, maambɛbɛ dibu kətə ɛsuə. Fɛɛ nwə laabɛbɛ nkə betidi tɛsə mɛɛ, kpɛ. Wə ni nwə laakpɔ lekpɔ kayenko lə kusu ɛsuə nɛ. ⁵¹ Nlɛ mi bɔtɛyi sitinti minkə, lə utsyuə eetsyuə mɔ asatete kotoo, wəmbukpə kulefe!”

⁵² Yudafo átɛyɛ wə bənkə, “Mfe fɛ buunyə boə lɛwɔnɔ bua təkəkɔ fə nɛ! Abraham əkɔpə, nya Onantɔ eto bənyɛləkətidi tsya díkpə, fɛɛ fə lɛ bɔtɛyi fə nwə ke ditsyuə fə asatete kotoo, ɛmbukpə kulefe! ⁵³ Bubu feebu fə fə lɛmɔ fanso Boantɔ Abraham wə díkpə, fɛɛ? Onantɔ eto bənyɛləkətidi tsya əkɔpə! Owɔe eto okle feebu fə wə feni?”

⁵⁴ Mfó nya Yesu díte mbuayɛ nkə, “Lə mɔ ɛsuə maatesɛɛ, nyalɛ mɔ atɛsə nyamə manle kulesa. Fɛɛ nwə laatesə mɛɛ, wə ni mɔ Antɔ. Wə ni nwə biatɛyi biə wə ni mi Onantɔ nɛ.

⁵⁵ Mii, binyi wə. Fɛ mɔɔ, nyi wə. Lə ntɛyi miə minnyi wəə, nyalɛ moofiani odia fɛ mi ke, fɛɛ nyi wə, nya meetsyuə wə ditiki koto. ⁵⁶ Mi antɔ Abraham ɛnyə disuəyuə se ɔnɔ mɔ bubə eto asa. Nyaso úfi ɛnəmi útəkə lə mɔ bubə ɛsuə nya únyə disuəyuə.”

⁵⁷ Yudafo bamə átɛyi wə bənkə, “Ámamfo tɔ alɛ fosi anɔ kulaa tsya, nya bɔtɛyi fanlɛ bɔtɛyi fə eyi Abraham?”

⁵⁸ Mfó Yesu letɛyi mə nkə, “Nlɛ mi bɔtɛyi sitinti miə, mɔɔ, mfe nkpe koko fɛ bále Abraham.”

⁵⁹ Ete básɛ abambi bə baato wə, fɛɛ Yesu ákula ɛsuə nya ɔbɔ údu lə Kedikətəkɔ mfó.

9

Yesu Átsya Unəmba Utsyuə.

¹ Se Yesu díbə ófe ɔntɔɔ, únyə utidi utsyuə wə bále unəmba. ² Wə bakasebi áto wə bənkə, “Oteasa, owoe eto lebua díte bále osani əmfo unəmba? Wə kosate eso lee wə antomə eto abua eso?”

³ Mfó Yesu díte mə mbuaye nkə, “Inni nwə mfo nye wə antomə díyifo lebua eso. Bomu bále wə nko bə lə eye lə wə əsuə lə Onanto lə uləkə wə keyifo eto əsuəale ote betidi. ⁴ Se bonkpe lə kalesiəsiə əsuə esoo, ele bə buyifo keyifo butə nwə létsyese mə. Kale əbə bolo nya kuutsyuə saa lənsiembofo keyifo buyifo. ⁵ Lefenə eto lefe minsi minkpe lə kawunsiəə, mə ni kawunsiə eto diyənde.”

⁶ Se Yesu ləteyi nko ólosəə, ókpo ntufə lə kasɔ, ówɔ site úfi se údikiti wə lə ənəmi, ⁷ nya áteyi wə nkə, “Su lə esu əflə ntu lə Siloa eto Ditubiə əsuə.” Siloa eto kasɔ ni nkə Bákpe wə. Nyaso osani əmə ésu úflə ntu bomə. Nya wə ənəmi ləsinini ɔnlə asa bunyə, nya úsinkli úbə oto.

⁸ Wonko mba nkpe lə koyotsya ku betidi ba kenke díkənyə wə ɔnlə asa bɔtɔɔ, áto bənkə, “Inni osani əmfo ni nwə díkəsiə lə mfó úkatɔ asa?”

⁹ Bətsyuə áteyi bə wə uni. Fəə babamba áteyi bənkə, “Owo lo, inni wə uni. Bole ete ole wə.”

Mfó nya utidi əmə kosate ləteyi nkə, “Mə uni!”

¹⁰ Bátɔ wə bənkə, “Ntsyə ibə fə fanlə asa bunyə?”

11 Útə mbuayɛ nkə, “Utidi wə baakpo Yesu lɛwɔ sitə udikiti mɛ lə ənəmi nya ótɛyi mɛ nkə nsu mflə ənəmi lə Siloa eto ditubiə. Nyaso nsu, nya se mímflə ənəmi mínlosə ete míntsyiko asa bunyə.”

12 Bátɔ wə bə, “Sieti onkpe?”

Útə mə mbuayɛ nkə, “Mante kaka onkpe.”

Farisifo Átɔ Unəmba Əmə Kase Báye Bátsya Wə.

13 Bákpa nwə eto ənəmi léba kɔ əməə, bésuko Farisifo bamə ɔflɔ. 14 Diyi nə Yesu lɛnwɔ sitə údikiti lə unəmba əmə eto ənəmi fɛ ótsya wəə, éyifo Ɔnwéditsyəyi.

15 Nya Farisifo bamə tsya lɛtɔ osani əmə kase íyifo fɛ útsyiko asa bunyə. Ótɛyi mə nkə, “Sitə ɔnwɔ úfi údikiti mɛ lə ənəmi. Nya mímflə mɔ ənəmi ete míntsyiko asa bunyə.”

16 Mfó nya Farisifo bamə eto bətsyuə lɛtɛyi wə bənkə, “Utidi wə díyifo nyamfo embofo Onanto ɔflɔ butsyi! Itsyise weenyifo lə Ɔnwéditsyəyi eto kɔfi əsuə.”

Fɛɛ mə bətsyuə bamba átɛyi bənkə, “Ntsyɛ yoofɔ bubə bə obuayifo ebofo ayanisa nyamfo eto okle buyifo kate?” Itə kəsənsə édufə mə lenti.

17 Nyaso Farisifo bamə esi bátɔ osani əmə bənkə, “Se fanlɛ bɔtɛyi fənkə wə lɛsini fə ənəmii, be ni fə nsusu itsyi lə wə əsuə?”

Mfó nya osani əmə díte mbuayɛ nkə, “Onanto eto Unyɛləkətidi uni.”

18 Yudafo bamə mámfo báno sitinti bə osani əmə ába ənəmi fə usi útsyiko asa bunyə isu ese lefe nə bákpadí wə anto mə díbə.

19 Bátə mə bə, “Mi ubisaibi ni nwə mfo? Biə béle wə unəmba, nya ntsyə iyifo fə omfe ɔnlɛ asa bunyə mómɔ?”

20 Wə anto mə ətə mbuayɛ bənkə, “Buyi boə bo ubi uni. Nya bunyi tsya boə bole wə unəmba.

21 Fɛɛ bunyi kase íyifo fə omfe ɔnlɛ asa bunyə. Nya bunyi futsyə tsya létsya wə ənəmi nyamə. Bətə wə kosate lə ɔtɛyi mi itsyise wóobe!”

22 Wə antomə átɛyi nyamfo nko itsyise balɛ Yudafo sikpi bote, itsyise Yudafo átɛyi bətsyə bə utsyəə ke létɛyi nkə ófo Yesu ɔno fe Nwə Onanto Lékpo ɔhile Utsyəə, booləkə wə betsyiko lə mə katsyakə. 23 Nyamfo eso wə antomə létɛyi bənkə, “Wóobe, bətə wə kosate nɛ!”

24 Bákpadí nwə bále unəmba əmə dinuəfə nya bátɛyi wə bənkə, “Te Onanto sikpi lə atɛyi bo sitinti! Buyi boə utidi wə létsya fə mfó eyifo obuayifo!”

25 Osani əmə ətə mə mbuayɛ nkə, “Mɔɔ, minnyi lə obuayifo ni osani əmfɔ lee unni. Lesa lɔni minyi mɔɔtɛyi ni bənkə, kɔɔ mba ənəmi. Fɛɛ mómɔɔ, mfe nle bunyə!”

26 Bátə wə bənkə, “Be úyifo fə nya ntsyə óyɛ ótsya fə ənəmi nyamə?”

27 Útə mbuayɛ nkə, “Mboka mi bətɛyi éfe, fɛɛ bianla biə biafo nnya. Beso bela biə bisi biano nnya? Lee, bela biə miítsya afiani wə bakasebii?”

28 Báka wə bátɛyi bənkə, “Fə ete ni wə okasebi. Boo, Moses eto bakasebi buni. 29 Buyi boə Onanto édíko Moses etiki. Nya nwə mfo alɛɛ, boante kaka utsyi kulaa tsya!”

30 Mfó nya osani əmə lɛɛyi mə nkə, “Nte ditiki nə eto okle ni nəmfo? Binyi kaka utsyi, fɛɛ wə lɛsini mə ənəmi nɛ! 31 Buyi boə Onanto eentsyue babuayifo koto, fɛɛ lə utsyue eesumu Onanto, nya weeyifo wə lelabbii, weetsyue wə koto kanɔ wə olatoto. 32 Idu taa kawunsie eto kasɔ ketsyikokɔɔ, bóannɔ tɔ bə kuutsyue saa wə átsya nwə bále unəmba. 33 Lenni Onanto ɔflo utsyii, eni wəmbɔfo kulesa buyifo.”

34 Batɛyi wə bənkə, “Fəə bále ku lebuə fábe ku nii! Nya fə bomu lela fə aate bo asaa?” Nyaso bála wə, bábɔnko lə Yudafo eto katsyako kamə.

Betidi Bətsyue Eebu Bə Bəənyə Asa Wuee.

35 Yesu áno nkə bála wə nyaso se únyə osani əməə, ɔto wə nkə, “Áfo Utidi Eto Ubi áno?”

36 Osani əmə ətə wə mbuayɛ nkə, “Nto, te mə futsyə uni, bə lə mfo wə nno.”

37 Mfó nya Yesu lɛɛyi wə nkə, “Ébunyə utidi əmə koko, nnyə wə ni nwə nɛ fə etiki budinko mfo mɔmɔ nɛ.”

38 Osani əmə átɛyi nkə, “Bonamute, mfo nno!” Nya óse akonki lə Yesu eto ənəmi úsumu wə.

39 Yesu átɛyi nkə, “Mbə kawunsie kamfo bə lə nkponko betidi lekpo, bə lə bənəmba lə bənyə asa, nya mba ləənyəə, lə bafiani bənəmba.”

40 Farisifo ba dínyè mfo leno nnya Yesu lètɛyii, áto wè nkè, “Nyale botɛyi fanlè fè bo tsya ába ənəmi lee?”

41 Yesu ətə mə mbuayɛ nkè, “Lə boba mi ənəmi lebaa, eni biebudɪ dikpi, fɛɛ se biə bɛlɛ bunyɛ esoo, mi abua təkə mi lə əsuə.”

10

Nwə Nyi Basamu Bɔyenko, Aalɛ Mə Ola.

1 Yesu átɛyi mə nkè, “Nlɛ mi botɛyi sitinti miə, utsyuə saa ke dímanyɛ lə lesamuyo eto kesie údufə lesamuyo nəməə, bomu óyɛ kusu bamba saa údufə lə ni kafoo, eyifo uyu ku nwə laabiasə asa. 2 Nyaa, nwə ke laayɛ lə kesie kedufə lesamuyo nəmə kafoo, wə ni nwə laayenko basamu tinti nɛ. 3 Nya nwə laase lesamuyo eto kesie aasini kesie eto siku kətə wə. Woakpadi basamu bamə lə mə aye nya baano wə ɔkɔɛ nya woakpa mə kabonko. 4 Lə okpadi mə nya ɔyenko mə ɔbonkoo, woato mə sɛto kayenko mə nya bəətəkəkə wə kama it-syise beeyi wə ɔkɔɛ. 5 Bəmbutəkəkə kuutsyuə bamba kama. Bomu bootsyetsyi bedu itsyise benyi wə ɔkɔɛ.”

6 Yesu átɛyi mə lekpa nəmfo, fɛɛ bánno nnya ótɛyi mə eto kasɔ. 7 Lə nyamfo esoo, Yesu esi ótɛyi mə nkè, “Lə sitintii, mə ni kesie itə basamu bamə. 8 Betidi ba kenke lɛto mə sɛto bəbəə, beyifo beyu ku mba laabiasə asa. Fɛɛ basamu bamə méntsyue mə koto. 9 Mɔ ni kesie kamə. Lə utsyuə ayɛ lə mə udufə lə kafoo, wuunyə bofo. Wuudufə lə mfó ukabo, nya

wuunyə didisa sɛɛ ukedi. ¹⁰ Uyuu, bubə ete woəbə nkə lə uyu, olo utidi, obiasə asa. Mɔɔ, mbə miə lə binyə nkpə, nkpə bo lɛflɔ.

¹¹ “Mɔ ni utinti wə laayenko basamu, nwə lɛtɔnɔ nkə weefi wə nkpə utə lə wə basamu eto disi. ¹² Utidi wə laayenko basamu wə baafɔ diyi eto kayo nya benni wə kosate eto balee, weetsyetsyi kedu lə unyə ukiti nɛ bubə. Ukiti əmə eedufə mə lenti kəmuə mə nya wəəsensə mə. ¹³ Utidi əmfɔ eetsyetsyi kedu itsyise diyi eto uyifoyifo ete uni. Nya basamu bamə eto bɔflɔ nye mə kasɛ aanka wə.

¹⁴⁻¹⁵ “Mɔ ni utinti wə laayenko basamu. Fe kase Anto əmə nyi mɛɛ, nya mintsya nyi wəə, nko ke mintsya nyi mɔ basamu, nya məətsya nyi mɛ nɛ. Nya mɛntɔnɔ miə məəkpə lə mə disi. ¹⁶ Nkpə basamu bamba ba ləmbə lə lesamuyo nəmfɔ tɔ. Ele bə nyenko mə tsya mboko, nya mə tsya lə banɔ mɔ ɔkɔɛ. Nya məmblɛ loofiani basamu eto ditsyukpa lɔni lə ɔyenkoyenko ɔni eto kalɔ.

¹⁷ “Anto əmə aala mɛ, itsyise ntɔnɔ miə məəkpə lə mə disi, bə lə nsinkli mbə nsie nkpə bio. ¹⁸ Kuutsyuə saa embofo mɔ nkpə bofo lə mɔ ani, bomu mɔ kosate dɛfi mu mɛntə miə məəkpə. Nkpə əsuəale bə mofo mu bufi kətə. Nya əsuəale si ekpe mɛ bə nsinkli mfo mu. Nko əmə mɔ Anto dɛtə mɛ nkə nyifo nɛ.”

¹⁹ Lə etiki nnya Yesu lɛtyi mfo esoo, kabakəfə esi kədufə lə Yudafo bamə nti. ²⁰ Mə nti eto bətsyuə kpə átɛyi bənkə, “Lɛwɔnɔ bua təkəko wə. Ɔlɛ kumunə bukɔpə! Beso ele bə besi betsyue wə koto fɛ?”

21 Fɛɛ babamba tsya áteyi bɛnkɛ, “Utidi wɛ əsuɛ lɛwɔnɔ bua nkpee, embofo etiki nyamfo eto okle bɔteyi! Ntsyɛ lɛwɔnɔ bua luuyifo unɛmba si unyɛ asa fɛ?”

Yudafɔ Mámfo Yesu Bánɔ.

22 Lɛyɔlefee, nya beedi Yudafɔ eto Disumuyo Bufikakpe lɛ Onanto kɔni eto Diyi lɛ Yerusalem. 23 Yesu ákayɛ kafe lɛ Disumuyo eto lekpake nɛ baakpɔ Solomo eto Ablanase mfó. 24 Mfó nya Yudafɔ bamɛ létsyilama wɛ, nya bátɔ wɛ bɛnkɛ, “Isu ese dimamfe lefe kon fookpe bo lɛ ketuntu əsuɛ esu ase? Teyi bo sitinti siamɛ, lɛ fɛ ni Utidi əmɛ Bákpɔ ɔhile Bɔtsyɛ.”

25 Yesu ɛtɛ mɛ mbuayɛ nkɛ, “Mboteyi mi nyamfo koko, tsya biamfo mɛ akanɔ. Asa nnya meeyifo lɛ mɔ Anto eto əsuɛale əsuɛ, lɛ mɛ bulɛkɛ kate. 26 Fɛɛ biɛmbofo mɛ bɛnɔ, itsyise bientsyi mɔ basamu bamɛ nti. 27 Mɔ basamu eetsyue mɛ koto. Nyi mɛ, nya bɛtɛkɛko mɛ. 28 Ntɛ mɛ nkpɛ manlo, nya bemuukpɛ kulefe. Nya kuutsyuɛ saa embofo mɛ lɛ əsuɛale əsuɛ lɛ mɔ kɔni. 29 Mɔ Anto wɛ dífi mɛ útɛ mɛɛ, kpe ale oso lesa saa. Kuutsyuɛ saa embofo mɛ bofo lɛ əsuɛale əsuɛ lɛ mɔ Anto eto kɔni kulefe kulefe. 30 Anto əmɛ ku mɔɔ, eyifo bani.”

31 Mfó nya Yudafɔ bamɛ dísi básɛ aba bɛ bato wɛ. 32 Yesu áteyi mɛ nkɛ, “Nyifo nnyifo sɛɛ kpɛ bo mɔ Anto lékpɛ mɛ lɛ mi nti. Nya nte nnya eso bela biɛ biakpɔ mɛ aba?”

33 Yudafɔ bamɛ ɛtɛ wɛ mbuayɛ bɛnkɛ, “Inni nnyifo sɛɛ bo féyifo eso boɛ boakpɔ fɛ aba.

Bomu mbusiotiki nnya fédi eso! Utidinini ete feni, fεε éfi fə əsuə éyifo fe Onanto!”

³⁴ Mfó nya Yesu díτə mbuayε nkə, “Báwɔni bákpe lə mi kosate eto Kɔfi eto Kukue bə Onanto átɛyi nkə, ‘Beyifo fe bananto.’ ³⁵ Buyi boə lesa nə báwɔni bákpe lə Awɔnisa Kεnkε eto Kukue, eyifo sitinti itə lefe saa. Nya mfó Onanto lékpadi betidi ba léfo wə Ditiki Sεε nəmə nkə, ‘Beyifo fe bananto.’ ³⁶ Fεε mɔɔ, Anto əmə díləkə mε nya ótsyese mε kawunsia nε. Nya ntsyə eso fε biɔtɛyi biə ndi mbusiotiki lə nnya míntɛyi miə nyifo Onanto eto Ubi? ³⁷ Lə minlε mɔ Anto eto nnyifo buyifoo, nyalε biamfo mε bεnɔ. ³⁸ Fεε lə nlε mu buyifoo, lə biamfo mε bεnɔ tsyaa, ele bə befo asa nnya meeyifo bεnɔ, bə lə bete lə bεnɔ nnya kasɔ biə Anto əmə si lə mε, nya mintsya nsi nkɔ lə wə.”

³⁹ Mfó tsyaa, besi bála bə bəəmua Yesu, fεε usi óbɔ lə mə nti údu.

⁴⁰ Yesu esi úsu óyila Ketu Yordan úsu kaka Yohanes díyifo betidi ntuflesəfləsə eto lekpa tute, nya ótsyime mfó. ⁴¹ Betidi kɔə əbə wə oflɔ nya bátɛyi bənkə, “Yohanes ményifo ayanisa saa óte. Fεε lesa saa nə ótɛyi itsyi lə utidi əmfo əsuə eyifo sitinti.” ⁴² Nya betidi kɔə lə mfó léfo wə bánɔ.

11

Lazaro Eto Ukpə.

¹ Osani utsyuə baakpo Lazaro wə dísiə lə umə wə baakpo Betania ánɔ bufi. Wə ku wə bayimisiə inuə ba baakpo Maria ku Marta dísiə

lə umə əmə. ² Maria əmfo ni nwə dífi nnuəbi bo laanyi fififi ókpo Bonamute Yesu lə akpa nya úfi wə disi eto sɛwɔni ósi wə akpa nyamə. Wə ɔyimisani ni Lazaro wə lenɔ bufi bɔnlɛ bɔtɛyi mfo nɛ. ³ Wə bayimisiɔ bamfo átsyese Yesu kɛnyɛ bə, “Bonamute, fə ɔyetsyuə lala áno bufi!”

⁴ Se Yesu léfo kɛnyɛ kamfoo, ótɛyi nkə, “Bufi bomfo enni bukpəmfi itə wə, bomu iyifo nnya əsuə buufi babesə Onanto eto diye kato, nya eyɛ lə nnya əsuə babesə Onanto eto Ubi tsya kato.” ⁵ Nyaa, Yesu ála Marta ku wə ɔyimisiɔ ku Lazaro eto asa tinti. ⁶ Fɛɛ se óno nkə óno bufi, usi ókɛ mfó eyi ənuə okpɛ.

⁷ Nyamfo eto kamaa, ótɛyi wə bakasebi nkə, “Bitə lə businkli busu Yudea.”

⁸ Mfó nya wə bakasebi létɛyɛ wə nkə, “Oteasa, kayinkənə ete Yudafo díkabɛbɛ kusu bə baakpɔ fə aba, nya fanlɛ bɔtɛyi fənkə busi boesu mfó?”

⁹ Yesu etə mə mbuayɛ nkə, “Inni lefosi abombosɔ ənuə nkpe lə diyi eto kalekpakpa əsuə? Lə utsyuə lə bɔyɛ lə kalekpakpa əsuə, weentusə itsyise ɔlɛ kawunsiə kamfo eto lekpasə bunyə. ¹⁰ Fɛɛ lə ketsyɛ ɔnlɛ bɔyɛɛ, wuutusə itsyise lekpasə əmbə itə wə.”

¹¹ Se Yesu létɛyi nyamfo ólosə, usi ótɛyi úkə nkə, “Bo ɔyetsyuə Lazaro lɛ selabe, nyaso ntɔ wə kasanklisə kɔ.”

¹² Se bakasebi bamə lenɔ nkoo, báɛyi wə bənkə, “Bonamute, lə selabe onlabee, nyalɛ yuuyuə wə.” ¹³ Fɛɛ Yesu wə lɛ bɔtɛyi nkə Lazaro ébukpə, fɛɛ wə bakasebi ébu bənkə selabe tinti ótɛyi utsyiko.

14 Nyaso Yesu ákpasè mè ótèyi nkè, “Lazaro òkpè. 15 Fèè lè mi esoo, èlèkè itè bè mánkè lè mfó fè úkpè, bè lè befo benò esoo. Nyaso bitè lè busu wè òfò mfó.”

16 Mfó nya Toma wè baakpo Òfimfinyè lètèyi wè bakaseyimitsyuè bamè nkè, “Bitè lè bo tsya lè butèkèko Oteasa busu bè lè busu bukpè ku wè!”

Yesu Ámansè Lazaro Eto Bayimi Lèko.

17 Lefe nè Yesu dísu údufè mfoo, ónò nkè bébikè Lazaro diyi nale ni diyi nèmfo nè. 18 Idu lè Betania isu Yerusalem eyifò fe esunkpo ènuè seka. 19 Nyaso Yudafò kpè èbè mfó bè bèèbè bamansè Maria ku Marta lèko se mè oyimisani díkpè eso.

20 Se Marta lenò nkè Yesu lè bubèè, úsu nkè weesu otsyako wè, fèè Maria ebu òkè lè diyo. 21 Marta átèyi Yesu nkè, “Bonamute, lè nnya ete fake mfoo, eni mò oyimisani mènkpè! 22 Fèè nnyi miè mòmò kulaa tsyaa, lesa saa nè fòtò Onantoo, wuutè fè ni.”

23 Mfó Yesu lètèyi wè nkè, “Fè oyimisani ebotaka ubè nkpè.”

24 Nya Marta lètèyi wè nkè, “Nyi miè wootaka ubè nkpè lè lefe nè bèkpènkpè lootaka lè Diyi Fèfè èsuè.”

25 Mfó Yesu lètèyi wè nkè, “Mò ni nwè lèètè bèkpèkpè eto botaka kènyè ku businkli kèbè bèsìè lè nkpè nè. Utsyuè saa ke léfo mè ónò, lè úkpè kulaa tsyaa, wuusìè nkpè. 26 Nya utsyuè saa ke nsi nkpè nya ófo mè ónnò, embukpè kulefe. Afo nyamfo anò?”

27 Útə mbuayɛ nkə, “Ee, Bonamute. Mfo nno miə fə ni Nwə Onanto Lékpó Ɔhile Utsyə, Onanto eto Ubi nwə bátəyi bətsyə bə wuubə kawunsiə.”

28 Se Marta letəyi nyamfo ólosəə, úsu ókpadi wə ɔyimisio Maria, nya ótəyi wə buɛ nkə, “Oteasa əmə ebubə nya ɔnlɛ fə disi bɔtɔ.”

29 Se Maria lenɔ nkoo, ótaka mlə nya úsu wə katsyakokɔ. 30 Lefe nəmfoo, Yesu méndufə tɔ umə kafo. Bomu usi únyə lə kaka Marta díbə otsyako wə mfó. 31 Se Yudafɔ ba nsi lə diyo lə Maria ɔflo banlɛ wə lekɔ bomansə dínyə bə ótaka kplaa, mə tsya átaka bətəkəko Maria kama. Bébu bə kudi komə eti ɔntɔ lə usi usu uwi keku.

32 Se Maria dísu údufə kaka Yesu nyəə, óse akonki lə wə akɔ nya ótəyi wə nkə, “Bonamute, lə nnya ete fáke mfoo, eni mə ɔyimisani mənkpə!”

33 Yesu ənyə kase Maria ku betidi ba dítekəko wə nlɛ nku. Ílə wə lə utu nya óla ówɔnɔ hũũ. 34 Ótɔ mə nkə, “Sieti bíbikə wə?”

Bətə mbuayɛ bənkə, “Bonamute, bə lə əbə abe.”

35 Mfóo, Yesu éwi keku.

36 Nya Yudafɔ bamə letəyi bənkə, “Bebe kase ko óla wəə!”

37 Fɛɛ mə bətsyuə átəyi bənkə, “Ósini un-
emba ənəmi nya ɔnlɛ asa bunyə. Beso wəntə
lə Lazaro lə ɔyɛ bukəpə?”

Yesu Átakasə Lazaro Útsyiko Ɔkɔmə.

38 Isi ílə Yesu tinti, nya ónyí úsu kudi komə ɔflo. Kudi komə eyifo dibíə lə koba kafo nya

béfi leba béti ko kenye. ³⁹ Yesu áteyi mə nkə, “Benyi leba nəmə lə kudi komə eto kenye.”

Mfó nya Lazaro əmə eto oyimisió Marta leteyi Yesu nkə, “Bonamute, wuukanyi mómó, itsyise mmi ni diyi nale se bébikə wə nə!”

⁴⁰ Yesu áteyi wə nkə, “Mánteyi fə minkə lə áfo mə ánoo, ebunyə Onanto eto diyənde?”

⁴¹ Nyaso bányi leba nəmə lə kudi komə eto kenye. Yesu ábesə ənəmi kato óbe nya óteyi nkə, “Nto, maaso fə ani, itsyise eetsyue mə koto lə nkpadí fə. ⁴² Nyi miə eetsyue mə koto lefe saa. Fə mba nyə mfo eso minle nyamfo boteyi nko, bə lə bafo banó bə fə lékpe mə koto.”

⁴³ Se óteyi nyamfo nkoo, ófa bembembe nkə, “Lazaro, bə əbə!” ⁴⁴ Nya ukpənkpə əmə ləbó úbə ku kafia ka béfi bémini wə əsuə ku nka béfi bémini wə ənəmi.

Nya Yesu leteyi mə nkə, “Beyankli we bikə biamə lə əsuə lə udu.”

Yudafó Ákpe Disi Bə Baalo Yesu.

⁴⁵ Lə nyamfo esoo, Yudafó ba díbə Maria oflo nya bənyə nnya Yesu díyifoo, eto bətsyuə kpə áfo wə bánó. ⁴⁶ Fə mə bətsyuə édu bésu Farisifó oflo nya bəteyi mə lesa nə Yesu díyifo.

⁴⁷ Nyaso Farisifó ku besumunyə ninə ákpe disi ku Yudafó eto batənkotənkó nya bəto bətsyuə bənkə, “Be ele bə buyifo? Bebe ayanisa kpə nnya osani əmfo nle buyifo kate! ⁴⁸ Lə butə wə kusu onle nyamfo buyifo nkoo, utsyuə saa ebofo wə onó. Nya Romafó luubə baba bo Disumuyo kənkə kamə ku kusə komə tsya!”

⁴⁹ Mfóo, mə nti eto nwə baakpo Kayafa, wə ni Usumunyə Ninə lələ nəmfoo, leteyi mə nkə, “Ntsyə asakasɔnɔnɔ lələ mi mmə! ⁵⁰ Binyi tɔ biə ɛlɛkɛ bə utidi ɔni kpə lə kusə komə eto disi enso bə kusə komə kenke eto betidi tsylɔ lee?”

⁵¹ Lə sitintii, wóanteyi nyamfo ɛye lə wə kosate eto nsusu əsuə. Bomu fe nwə ni Usumunyə Ninə itə lələ nəmfo esoo, Onanto áye lə wə əsuə útə nkə ɔteyi nyamfo, nnya ni katɛyikətsyə bə Yesu ebubə ukpə lə Yudafɔ kenke eto disi. ⁵² Inni bənkə lə ukpə lə kusə komə eto disi mate ete. Bomu bə ɛye lə nnya əsuəə, lə ɔɔ Onanto eto bebi ba kenke dínsə bankpo lə kawunsiə eto akpɔ akpɔ nnya kenke lebo, beyifo bani.

⁵³ Lə nyaso ídu dinəmfo əsuə, Yudafɔ eto beninə bamə dítsyiko esu bəbɛbɛ kase bomuə Yesu lə balo wə. ⁵⁴ Lə nyamfo esoo, Yesu ménsifo bɔye kafe mmə lə Yudafɔ nti. Bomu údu úsu úsiə lə uməbibi wə baakpo Efraim kaka lefi mfiminti. Mfó wonko wə bakasebi dísiə.

⁵⁵ Lefe nəmfoo, Yudafɔ eto Ukpə Ása Bo Óyila eto Diyi didife éboyo elo. Nya betidi kpə dítsyi kasɔ kamə eto akpɔakpɔ bésu Yerusalem lə besu bəmuə əsuə beyifo əsuəfləflə eto ləkpa nəmə fe lə diyididi nəmə lə leyo. ⁵⁶ Se bənyə lə Disumuyo nəməə, bákabɛbɛ Yesu nya bákato bətsyuə bənkə, “Ntsyə bibu? Nyi miə wəmbəfofi diyi nəmə kedikɔ bubə, lee ntsyə ini?” ⁵⁷ Lefe nəmfóo, besumunyə ninə ku Farisifo ébutə bote bə lə utsyuə yi kaka Yesu nkpee, lə ubə utə mə bote, lə besu bəmuə wə.

12

Maria Édiki Yesu Nnuəbi Lə Betania.

¹ Se ibu eyi akua lə bedi Ukpə Ása Bo Óyila eto Diyii, Yesu ésu Betania, kaka Lazaro wə Yesu létakasə utsyiko ɔkɔmə ditsyi. ² Mfóo, banwa ditsyitsyosa bətə wə bə lə udi. Marta ni nwə ləwunsəko mə lə lesa nəmə kedikɔ. Lazaro tsya akɛ lə mba ku Yesu dídi lesa nəmə nti. ³ Mfó əmə nya Maria dífi nnuəbi bo laanyi fififi bəyifo betsyiko lə nnya baakpo naadi əsuə, nya bofo koya tinti eto dituntu kplɛ tɔ úsu ókpo Yesu lə akpa. Nya úfi wə disí eto sɛwɔni ósi wə akpa. Bɔnyi fififi bomə éyi diyo nəmə kenke.

⁴ Nya Yesu eto okasebi ɔni wə ni Yuda Iskariot, nwə luubə udu Yesu utə lətɛyi nkə, ⁵ “Beso bánte nnuəbi bomfo sika flubia alofa ətsyə befi atabi nyamə bətə bakombo?” ⁶ Fɛɛ inni lə kase Yuda dífi kətsyuə lə bakombo eto asa eso ɔtɛyi nyamfo nko. Bomu uyu uni. Wə ɔflɔ atabi eto otobe ditsyə, nya úkeyu atabi nyamə eto ətsyuə kələkə kətə əsuə.

⁷ Yesu átɛyi nkə, “Beyani wə kpoo. Bitə lə uyifo lesa nə wofo buyifo kətsyə itə mɔ kəbikə. ⁸ Bakombo kpe lə mi ɔflɔ lefe saa. Fɛɛ mɔɔ, məmɔkɛ lə mi ɔflɔ lefe saa.”

Yudafɔ Efi Nsusu Bua Lə Lazaro Əsuə.

⁹ Se Yudafɔ kpə lɛnɔ bə Yesu kpe lə Betania, bėti wə bésu mfó. Nya inni Yesu mate eso bésu mfó, bomu lə bənyə Lazaro wə Yesu létakasə utsyiko ɔkɔmə tsya. ¹⁰ Lə nyaso besumunyə ninə átsya bəfi nsusu bə boolo

wuntsya. ¹¹ Itsyise eye læ Lazaro əsuə esoo, Yudafo kpə læ kesumu bəni kətənko Yesu kama.

Yesu Ésu Údufə Yerusalem Ku Disuəyue Kplε Fe Oka.

¹² Se kale dísiə, betidi eto ditsyukpa kplε nə díbə Ukpə Ása Bo Óyila eto diyisεε nəmə kedikoo, áno bæ Yesu læ Yerusalem bubə.

¹³ Nyaso béfi katodi nya bésu bæ baatsyako wə. Bákafa katéyi bənkə,

“Hosiana! Atəsə itə Onanto!

Bətəsə nwə nlε bubə læ Bonamute eto diye əsuə!

Atəsə itə Israelfo eto Oka!”

¹⁴ Yesu ənyə oflimubi utsyuə nya úsiə læ wə fe kase bəwəni bákpe læ Awonisa Kenkε eto Kukue əsuə bənkə,

¹⁵ “Biante sikpi mi Sion eto umə eto betidi!

Nyə fə Oka nsi læ oflimubi əsuə onlε bubə!”

¹⁶ Tutεε, wə bakasebi mánnə nyamfo kasə. Fεε lefe nə Onanto díkatakasə Yesu utsyi okomə úbə ku dibuu, nya fε bákroma bæ nnya bəwəni bákpe læ Awonisa Kenkε eto Kukue əsuə etsyi læ wə əsuə, nya nnya ni asa nyamfo kenke bəyifo bətə wə nε.

¹⁷ Betidi ba dínyə mfó fε Yesu lékpadi Lazaro útsyiko kudi kafo læ okomə óboko nkpəə, ésu bətéyi lesa nə díbə mfó. ¹⁸ Nyamfo esoo, betidi kpə ésu bətsyako wə, itsyise bánə ayanisa nnya úyifo óte eso. ¹⁹ Mfó Farisifo bamə létéyi mə bətsyue bənkə, “Bebe, kulesa anlε bələkε kətə bo! Binyə biə kawunsie kenke édu bésu bətəkəko wə!”

Yesu Áteyi Útsyæ Nkæ Wæøbæ Bukpæ.

²⁰ Grikifo bətsyuə tsya akɛ lə betidi ba dísu Disumuyo lə Yerusalem lə diyi nəmə kedikɔ nti. ²¹ Bésu Filipino wə dítsyi Betsaida lə Galilea ɔflo, nya bátɛyi wə bənkə, “Boanto, bola boə boənyə Yesu.” ²² Filipino ésu óteyi Andrea nya mə inuə bamə dídu bésu bátɛyi Yesu.

²³ Mfó nya Yesu létɛyi nkə, “Lefe nəmə eboyo bə babesə Utidi Eto Ubi əmə eto diye kato. ²⁴ Nlɛ mi bətɛyi sitinti miə lə banto lentabi nəmə lə kasɔ dibuu, lentabi looni ete disi diudi. Fɛɛ lə dibuu, nya fɛ dionwɔ ebibi kpə nɛ. ²⁵ Utidi wə lela wə kosate eto nkɛpə, ebonyansə mu. Fɛɛ nwə dikisi wə kosate eto nkɛpə lə kawunsie kamfoo, ebɔɔ mu utsyə itə nkɛpə manlo. ²⁶ Utsyuə saa ke lela nkə weeyifo mə keyifoo, ele bə utəkəko mɛ, itə bə mə uyifoyofɔ əmə ebusie lə kaka minsi. Nya utsyuə saa ke ni mə uyifoyifoo, mə Anto ebokpe wə dibu.

Yesu Édi Etiki Itsyi Lə Wə Ukpæ Əsuə.

²⁷ “Mómɔɔ, ɛɛ mɛ bulə lə mə ləkɔəsi. Fɛɛ be ko ele bə nteyi? Bətɛyi ele bə nteyi minkə, ‘Nto, məntə lə kanyi kamfo eto okle lə kətəkə mɛ lə əsuə lee’? Owo lo! Fɛɛ nyamfo eso mimbə kawunsie, bə lə nnyə kanyi kamfo eto okle nɛ. ²⁸ Nyaso Nto, tɛ lə babesə fə diye kato!”

Nya ɔkɔɛ ləbɔ utsyi kato nlɛ bətɛyi nkə, “Mbóbesə ni kato koko. Nya nsi muuyifo nko.”

²⁹ Se betidi ba dińyə mfo lenɔ ɔkɔɛ əməə, mə bətsyuə áteyi bənkə ɔsɔmi uni díkumi.

Nya bətsyuə lətəyi bənkə, “Onanto eto ɔtɔnkpe utsyuə ni lətəyi wə lesaatsyuə.” ³⁰ Mfó Yesu lətəyi mə nkə, “Inni mə eso ɔkɔɛ əmfó ləbɔ, bomu mi eso.

³¹ “Mɔmɔ ni lefe nə Onanto lookponko kawunsiə kamfo eto betidi lekpo. Nya Onanto luutu kawunsiə kamfo eto əsuəalenyə lə wə seka əsuə. ³² Fɛɛ lə betsiyə mə lə kasɔ babesə kato, muunə betidi kenke mboko mə ɔflo.” ³³ Lefe nə Yesu lətəyi nyamfoo, óte ukpə wə eto okle wəəbə bukpə.

³⁴ Mfó nya sitiditu siamə lətəyi nkə, “Bo kɔfi eto kukue lə bo bətəyi nkə, Utidi Wə Bákpo Ɔhile Bətsyuə ebusiə nkpə isu manlo manlo. Nya ntsyə ibə fɛ fanlɛ bətəyi fənkə boobesə Utidi Eto Ubi əmə kato? Owɔe ni Utidi Eto Ubi əmə mfo?”

³⁵ Yesu ətə mə mbuayɛ nkə, “Diyənde nəmə si diɔkɛ lə mi nti itə lefe sɛkɛ ete. Se diyənde nəmə nsi nkpe mi lenti esoo, bɛyɛ bɛtɔ, bə lə kale lə kayɛ mi bolo lə bidufə lə ketuntu əsuə. Itsyise nwə laayɛ lə ketuntuu, ante kaka ɔntɔ. ³⁶ Nyaso se lekpasə nkpe lə mi ntii, befo lekpasə nəmə bɛnɔ bə lə biyifo lekpasə eto betidi.”

Se Yesu lətəyi mə nyamfo ólosəə, údu lə mə ɔflo úsu ɔbiɔ.

Yudafɔ Ɛlɛkə Bate Bə Bámfo Yesu Banɔ.

³⁷ Ite bə Yesu éyifo ayanisa kpə lə mə ənəmi óte tsyaa, bámfo wə bánɔ.

³⁸ Fɛɛ nyamfo əbə itə nko, bə lə Onanto eto Unyeləkətidi Yesaya eto lesa nə ótəyi utsyə lə ibə itə nko nkə,

“Bonamute, owoe léfo ditiki nə bótɛyi ɔno?

Nya owoe Bonamute əmə díləkə wə əsuəale óte?”

³⁹ Lə nyamfó eso bámfo bofo kanɔ, itsyise Yesaya esi ótɛyi nkə,

⁴⁰ Onanto átɛyi nkə,

“Mba mə ənəmi nya míninəsə mə,

bə lə mə ənəmi lə ɛye asa bunyɔ.

Nya lə mə nsusu lə bɔye asa kaso bɔno.

Itə bəmbɔtsyi bawuninsə befi mə əsuə bətə mɛ, bə lə ntsya mə bufi.”

⁴¹ Yesaya átɛyi nyamfo itsyise úbunyə Yesu eto diyənde kokoko, nya údi etiki utsyi lə wə əsuə.

⁴² Fɛɛ ite nko tsyaa, Yudafo eto beninə kpə áfo Yesu banɔ. Fɛɛ lə Farisifo bamə eso baamfo etiki nyamfo budi kabɔsə ləkple betidi nɔ, bə lə bayɛ mə bola lə mə katsyakɔ eso. ⁴³ Baala bə baafɔ betidi eto atəsə enso atəsə nya ditsyi Onanto oflɔ.

⁴⁴ Nyaso Yesu édi etiki ófa bembembe ótɛyi nkə, “Utsyuə saa ke laafɔ mɛ kanɔ, inni mə mate ete ófo óno. Bomu ófo nwə létsyese mɛ tsya óno. ⁴⁵ Nya utsyuə saa ke ləənyə mɛɛ, əənyə nwə létsyese mɛ tsya. ⁴⁶ Mbə kawunsiə fe lekpasə, nya utsyuə saa ke léfo mɛ ɔno, ensiembəke lə ketuntu əsuə bio.

⁴⁷ “Lə utsyuə aanɔ mə ditiki nya weentsyue ni koto, məmbolo wə dikpi, itsyise məmbə miə maalo kawunsiə eto betidi dikpi. Bomu mbə miə lə mmfo ntə mə. ⁴⁸ Utidi wə kee leni mɛ nya wámmfo mə ditikii, kpɛ nwə lookponko wə lekpo. Etiki nya míndii, nya lookponko wə lekpo lə diyi fɛfɛ nəmə nɛ. ⁴⁹ Nyamfo eyifo

sitinti itsyise mánteyi kulesa læ mɔ əsuəale əsuə. Bomu mɔ Anto wə létsyese mæ, léte mæ lesa nə ele bə ntɛyi ku kase ele bə ntɛyi ni. ⁵⁰ Nya nnyi miə wə kɔfi komə əətə nkɔpə manlo. Nyaso lesa nə kee mínteyii, ni ni lesa nə Anto əmə letɛyi mæ nkə ntɛyi nɛ.”

13

Yesu Əflə Wə Bakasebi Eto Akpa.

¹ Ibu diyi lɔni fɛ læ bedi Ukpə Ása Bo Óyila eto diyisɛə nəmə. Yesu áte nkə wə lefe éboyo bə udu læ kawunsiə kamfo usu wə Anto ɔflo. Úkala mba ni wə bale læ kawunsiə mfo, nya óla mə sitinti isu ese taa kalosəkɔ.

² Yesu ku wə bakasebi ake læ lesakedikɔ ku ditsyitsyo nəmfó. Olo əmə ébusu údufə læ Yuda wə ni Simon Iskariot eto ubi eto nsusu nkə læ udi wə okpe læ udu Yesu utə wə balo.

³ Yesu áte nkə wə Anto éfi əsuəale saa útə wə læ lesa saa əsuə. Uyi nkə útsyi Onanto ɔflo nya usinkli ɔntɔ læ Onanto ɔflo. ⁴ Nyaso ótaka læ lesakedikɔ kamə nya úləkə wə awubunte kplɛ nnya kato útsyə nya úfi sebo ótsyasɛ læ nke. ⁵ Úkuti ntu ókpɔ læ ɔkpɛ kplɛ utsyuə kafo nya útsyiko wə bakasebi bamə eto akpa buflə, ákasi nnya ku sebo sia ótsyasə læ nke. ⁶ Se éyo Simon Petro əsuəə, ótɔ Yesu nkə, “Bonamute, buflə fəəbə mɛ akpa lee?”

⁷ Yesu ətə wə mbuayɛ nkə, “Amanno tɔ lesa nə minlə buyifo mfo eto kasɔ, fɛɛ kamaa, əbɔnɔ nnya kasɔ.”

⁸ Simon Petro ətə mbuayɛ nkə, “Kulefe! Məmbutə kusu miə læ əflə mɔ akpa kulefe.”

Mfó nya Yesu leteyi wə nkə, “Lə məmflə fə akpaa, nyalɛ ensiembuyə kedikɔ lə mɛ.”

⁹ Simon Petro átɛyi wə nkə, “Bonamute, nyalɛ məmflə mɔ akpa mate, bomu flə mɔ ani ku mɔ disi tsya!”

¹⁰ Yesu ətə wə mbuayɛ nkə, “Utsyuə saa ke díkəflə ntuu, ole. Nya weensihiã bə uflə wə əsuə bio, nnya lehiã ete ni bə uflə akpa. Itsyise wə kalebe saa ebole koko. Mi əsuə ébole, fɛɛ inni mimblɛ.” ¹¹ Yesu fe úyi nwə ləəbə wə bokpe lə ani, nyaso ótɛyi nkə, “Inni mimblɛ kenke lele.”

¹² Se Yesu díflə mə akpa ólosəə, úsinkli úfi wə awu ókpe, nya úsinkli úsu úsiə lə kasɔ lə kedikɔ kamə. Mfó nya ótɔ wə bakasebi bamə nkə, “Bɛnɔ lesa nə mínyifo mi mfo eto kasɔ?”

¹³ Biakpadi mɛ biə Oteasa ku Onamute, nya ɛflɔ bə bekpadi mɛ nko. Itsyise wə mini nɛ.

¹⁴ Mɔ, nwə ni mi Onamute ku Oteasa ébuflə mi akpa. Lə nko inii, ele bə mi tsya flə mi bətsyuə eto akpa. ¹⁵ Ditsyəbi dini mínyifo mínte mi, bə mi tsya lə biyifo fe kase mínyifo mínte mi.

¹⁶ Nlɛ mi bətɛyi sitinti miə uyifoyifo mamɔ oso wə Onamute. Nko ke ini bə ɔtɔyɛ mamɔ onso nwə lékpe wə kɔtɔ. ¹⁷ Se binyi sitinti siamfo esoo, Onanto ebokpo mi atsyɔ lə bɛyɛ lə sitintisu əsuə biyifo asa!

¹⁸ “Inni mimblɛ eto etiki minlɛ bətɛyi mfo. Nyi mba mínləkə lə mi nti. Fɛɛ ele bə Awɔnisa Kɛnkɛ eto Kukue eto etiki bə itə fe kase báwɔni nnya bətsyɛ, ‘Utidi wə lékpe kɔni lə ɔkpe ɔni ku mɛ búdi lesaa, wə ni nwə létaka únyə lə mɛ əsuə nɛ.’

19 “Nlɛ mi nyamfo bɔtɛyi katɔnsɛ fɛ lɛ ibɛ ibɛ, bɛ lɛ ibɛ ibɛ nko sitintii, biofo bɛnɔ biɛ Mɔ ni Nwɛ Mini. 20 Sitinti ini minlɛ mi bɔtɛyi minkɛ, utsyuɛ saa ke lefo utidi wɛ mɔntsyeseɛ, mɔ ɔfo. Nya utsyuɛ saa ke lɛfo mɛɛ, nwɛ lɛtsyese mɛ uni ɔfo.”

Yesu Ɔtɛyi Nwɛ Luudu Wɛ Utɛ Ɔtsyuɛ.

21 Se Yesu lɛtɛyi etiki nyamfo ɔlosɛɛ, ɔlɛ wɛ tinti lɛ lɛkɔɛsi. Nya ɔtɛyi ɔkpasɛ nkɛ, “Sitinti minlɛ mi bɔtɛyi mi nkɛ, mi nti eto ɔni ebudu mɛ utɛ.”

22 Mfɔ nya Yesu eto bakasebi bamɛ dɔtsyi bawuninsɛ bábɛ mɛ bɔtsyuɛ eto ɛnɛmi itsyise ɔyifo mɛ yaa, nya bántɛ mɛ nti eto nwɛ Yesu nlɛ. 23 Bakasebi bamɛ eto ɔni wɛ Yesu laala tintii, ɛsiɛ ɔfi Yesu. 24 Lɛ nyaso Simon Petro áma ɛnɛmi ɔkpe okasebi ɛmɛ, ɔtɛyi wɛ nkɛ, “Tɔ wɛ futsyɛ ɔnlɛ.”

25 Nyaso wuntsya ɛtsyue kɛnyɛ lɛ Yesu ɔflo nya ɔtɔ wɛ buɛ nkɛ, “Bonamute, owɛ ni futsyɛ?”

26 Mfɔ nya Yesu dɔtɛ mbuayɛ nkɛ, “Utidi wɛ muubudi lesa nto kutu ntɛɛ, wɛ uni nɛ.” Lɛ nyaso Yesu ɛbudi lesa sɛkɛ ɔfi ɔto kutu nya ɔfi ɔtɛ Yuda wɛ ni Simon Iskariot eto ubi. 27 Kase Yuda lefo lesa nɛmɛ koo, Obonsam ko dɔdɔfɛ wɛ lɛ ɛsuɛ.

Mfɔ nya Yesu lɛtɛyi wɛ nkɛ, “Kɔsɛ mlɛ lɛ eyifo lesa nɛ faala fɛ eeyifo.” 28 Fɛɛ bafɛfɛ ba nsi lɛ lesakedikɔ mfɔ mánno kasɔ lesa nɛ esɔ Yesu lɛtɛyi Yuda nko. 29 Mɛ bɔtsyuɛ ɛbu bɛ se ini Yuda dɔkalɛ mɛ otabitobe esoo, bɔtɛyi Yesu nlɛ wɛ nkɛ usu oya bikɛ bia boohiã itɛ

mə diyisεε nəmə eto budi oboko lee usu utə bakombo lesatsyuə.

³⁰ Nya se Yuda léfo lesa nəmə koo, ete óbo údu. Kətsyə tsya idi lefe nəmfó.

Yesu Etə Wə Bakasebi Kəfi Fəfə.

³¹ Se Yuda dídu eto kamaa, Yesu áteyi nkə, “Mómó, bábese Utidi Eto Ubi əmə eto diye kato. Nya eyε lə wə əsuə, bábese Onanto eto diye kato. ³² Lə bábese Onanto eto diye kato eyε lə Utidi Eto Ubi əmə əsuə, nyale Onanto ebuləkə Utidi Eto Ubi eto diyənde nə əsuə onkpe ote. Nya wuuyifo nkomə mómó mfofi.

³³ “Mó bebi, mensiembusiə lə mi oflo ekle bio. Biobεbε mə, fεε nlε mi bətəyi mómó fe kase míntəyi Yudafo eto beninə léfee miə, ‘Kaka mintó, biembofo mfó bubə.’

³⁴ “Nya mómó, nlε mi kəfi fəfə butə. Bela mi bətsyuə! Kase minla mii, mi tsya la mi bətsyuə nko ke. ³⁵ Lə bela bətsyuə, betidi ba tã ebɔyε lə nnya əsuə bate bə mɔ bakasebi bini.”

Yesu Áteyi Nkə Petro Əbɔni Wə.

³⁶ Simon Petro áto wə nkə, “Bonamute, se fantó?”

Yesu ətə wə mbuayε nkə, “Kaka mintó, embofo mə butəkəko kesu mómó. Fεε kamaa, ebutəkəko mə əbə mfó.”

³⁷ Petro áto wə nkə, “Bonamute, beso məmbofo fə butəkəko mómó kesu? Muukpə lə fə disi faa!”

³⁸ Mfó Yesu ətə wə mbuayε nkə, “Ebofo bukpə sitinti lə mɔ disi fε? Sitinti, nlε fə bətəyi

miə, fə ukusɛ luutə kɛnyɛɛ, əbɔni mɛ sitsyɛ, fə enyi mɛ kon.”

14

Yesu Ákpɛ Wə Bakasebi Nkɛ Ale.

¹ Yesu áɛyi mə nkə, “Biəntə lə ilə mi lə ləkɔɛsi. Fɛ kase béfo Onanto bɛnɔɔ, befo mintsya bɛnɔ. ² Lə mɔ Anto eto diyoo, nsiəkɔ kpə kpɛ. Ntɔ lə nsu nɔ nsiəkɔ ntsyɛ mi. Nya məmbɔɛyi mi nko, lenni nko ini. ³ Nya lə nsu nɔ nsiəkɔ ntsyɛ ntə mi nɔsəə, muusinkli mbə nkpa mi nsuko mɔ ɔflo, itə bə kaka minkpɛɛ, lə mi tsya lə bisie mfó. ⁴ Biyi kusu ko ntɔ lə kaka mintɔ.”

Yesu Ni Kusu Tinti Ko Ɛsuə Baayɛ Kesu Onanto Ɔflo.

⁵ Toma áɛyi wə nkə, “Bonamute, bunyi kaka fantɔ. Nya ntsyɛ buuyifo bote kusu ko bɔɔyɛ bubə fə aflɔ?”

⁶ Yesu ətə wə mbuayɛ nkə, “Mɔ ni kusu komə, sitinti siamə ku nkpə bomə. Kuutsyuə saa embubə Anto əmə ɔflo lə woanyɛ lə mɛ əsuə.” ⁷ Yesu áɛyi mə nkə, “Mɔmɔ əmə bimfi biinyi mɛɛ, bíote mɔ Anto əmə tsya. Nya idu mɔmɔ ɛntɔɔ, bifi biyi wə nya bíkənyɛ wə tsya.”

⁸ Filipino áɛyi wə nkə, “Bonamute, te bo Anto əmə ete imi bo.”

⁹ Yesu áɛyi wə nkə, “Filipo, kokooko əmə minkpɛ mi lə ɔfloɔ, ete binyi mɛ tɔ? Nwə ke díkənyɛ mɛɛ, ənyɛ mɔ Anto əmə tsya nɛ. Ntsyɛ eso fanɛ bɔɛyi fənkə, “Te bo Anto əmə?”

¹⁰ Filipino, nyalɛ ámamfo áno fə nkpɛ lə Anto

əmə əsuə nya wuntsya nkpe lə mɛ? Etiki nnya mɪntɛyi mii, mentsyi mɔ kosate ɔflo. Anto wə nkpe lə mɛɛ, leeyifo wə kosate eto keyifo. ¹¹ Befo mɛ bɛnɔ lə ntɛyi mi minkə, nkpe lə Anto əmə əsuə, nya wuntsya nkpe lə mɛ. Lə biamfo bɛnɔ, befo bɛnɔ lə ayanisa nnya meeyifo mate eso. ¹² Nlɛ mi bɔtɛyi sitinti minkə, nwə ke léfo mɛ ɔnɔ, ebuyifo asa nnya meeyifo. Sitinti, wuuyifo asa nnya nso nko kulaa tsya, itsyise ntɔ lɔ mɔ Anto əmə ɔflo. ¹³ Nya muuyifo lesa saa nə ke bɛtɔ lə mɔ diye əsuə ntə mi, bə lə babesə Anto əmə eto diye kato ɛye lə Ubi əmə əsuə. ¹⁴ Lə bɛtɔ lesa saa lə mɔ diye əsuə, muuyifo ni ntə mi.”

Yesu Átɛyi Wə Bakasebi Nkə Wuutə Mə Lɛwɔnɔ Kɛnkɛ.

¹⁵ Yesu esi ɔtɛyi nkə, “Lə biala mɛɛ, biutsyue mɔ afi koto. ¹⁶ Mɔɔtɔ Anto əmə lə utə mi ɔwunsəkotsyuə bamba wə luusiə ko mi lefe saa. ¹⁷ Wə ni Lɛwɔnɔ nə ləələkə sitinti lə Onanto əsuə kate. Fɛɛ kawunsiə eto betidi əmbofo wə bunyə fɛ lə besu bətsyə wə lekpo. Fɛɛ mii, biyi Lɛwɔnɔ nəmə itsyise usi ko mi nya onkpe lə mi əsuə.

¹⁸ “Lɛ ndu lə mi ɔflo, memoonyani mi mate ntsyə fe bakɔbebi. Bomu muusinkli mbə mi ɔflo. ¹⁹ Lə lefe kliminti əsuə, kawunsiə eto betidi ensiembunyə mɛ. Fɛɛ mi ebunyə mɛ. Nya se minsi nkpe eso, mi tsya ebusiə nkpe. ²⁰ Lə lefe nəmfóo, biunyə bitsyə lekpo biə nkpe lə Anto əmə əsuə, nya mi tsya nkpe lə mɛ, fe kase mintsya nkpe lə mi əsuə.

21 “Utsyuə saa wə laafo mɔ afi nya woeyifo lə nnya əsuə, wə ni nwə laala mɛ nɛ. Mɔ Anto ebola nwə laala mɛ. Nya mintsya loola wə nya muuləkə mɔ əsuə nte wə.”

22 Nya Yuda, wə lenni Iskariot, lɛtɔ Yesu nkə, “Bonamute, ntsyə fɛ ini bo mate ete fuuləkə əsuə ate, nya fəmbuləkə əsuə ate kawunsiə eto betidi?”

23 Mfó nya Yesu díte wə mbuayɛ nkə, “Utsyuə saa ke laala mɛɛ, wuutsyuə ditiki nə maate koto, nya mɔ Anto loola wə. Nya mɔ ku mɔ Anto əmə luubə bɔsonɔ wə, busiə wə lə ɔflo. 24 Utsyuə saa ke laanla mɛɛ, entsyuə mɔ asatete koto. Nya asatete nnya bíkanɔɔ, enni mɔ kosate eto ale. Bomu mɔ Anto wə létsyese mɛ eto ale ini.

25 “Mbɔteyi mi nyamfo kenke lə lefe minsi minkpe mi lə ɔflo. 26 Lɛwɔnɔ Kenke nə ni Ɔwunsəkotsyuə wə Onanto lootsyese lə mɔ diye əsuəə, ebote mi lesa saa nya wooklomasə mi lesa saa nə mínteyi mi.

27 “Diyuə lə disiiəko mi. Nya mɔ diyuə mimfi minlɛ mi butə. Inni lə kase kawunsiə eto betidi ləətə. Biəntə lə ilə mi lə lɛkɔəsi. Nya biante sikpi. 28 Bɛnɔ se mínteyi mi miə, ‘Nlɛ budu lə mi ɔflo, nya muusinkli mbə mi ɔflo.’ Lə nnya ete biala mɛɛ, eni biunyə disuəyuə bə ndu ntɔ lə Anto əmə ɔflo. Itsyise ɔmɔ oso mɛ. 29 Mbɔteyi mi nyamfo mɔmɔ fɛ lə ibə ibə, bə lə ibə ibə itəə, lə befo bɛnɔ. 30 Mensiembfofo mi etiki budinko kaklɛ itsyise kawunsiə kamfo eto oka lɛ bubə. Umbə əsuəale lə mɛ əsuə. 31 Fɛɛ ele bə kawunsiə te nkə maala Anto əmə, nyaso meeyifo lə kase ɔteyi mɛ nkə nyifo.

“Mómwɔ, bibə lə budu mfo.”

15

Yesu Ni Kudiyi Tinti Komə.

¹ “Mɔ ni kudiyi tinti komə, nya mɔ Anto ni kudiyi komə eto ɔkuɛmfo əmə. ² Waala mɔ kalɛ ka laannwɔ kələkə lə mɛ əsuə nya nka laannwɔ ebibii, waalɔ ke əsuə lə kase ufiebi lɔɔsɔ okpo ke bə lə kafo bɔnwɔ kukɔnɔ. ³ Mimii, bɔɔlɔ mi əsuə bətsyə koko tsya, eyɛ lə asa nnya mínte mi eso. ⁴ Bɛkɔ lə mɛ lə mintsya lə nyifo lɔni ku mi. Kuyi eto ɔlɛ əmbofo bɔnwɔ lə wə mate əsuə, wofo bɔnwɔ lə ɔlɛ əmə akɔ lə kuyi komə əsuə. Nko ke biembofo ebibi bɔnwɔ lə bianko lə mɛ əsuə nɛ.

⁵ “Mɔ ni kudiyi komə nɛ, nya mi ni ko kalɛ. Utidi wə ke lɛkɔ lə mɛɛ, nya mintsya lɛkɔ ku wəə, ɛbɔnwɔ ebibi kpə. Itsyise biembofo kulesa buyifo lə mimbə lə mi. ⁶ Futsyə ke dimankɔ ku mɛɛ, booto wə bakpe fe uyilɛ nya wookoe ofiani ɔtɔni. Baakpa kalɛ kamfo eto okle kətsyə ditsyu kakpe lə ute katonɔsə. ⁷ Lə biyifo lɔni ku mɛ nya mɔ etiki tsya nkpe lə mii, bɛtɔ lesa saa nə ke lefe itə mi, ete biofo ni. ⁸ Mɔ Anto eto diyənde ni bə lə bɛnwɔ ebibi kpə, nya eyɛ lə nyamfo əsuəə, nnya yuuləkə ete bə biyifo mɔ bakasebi nɛ. ⁹ Maala mi fe kase mɔ Anto laala mɛ. Nyaso bitə lə mɔ lelabi lə lɛkɛ mi lə əsuə. ¹⁰ Lə bitsyue mɔ afi kotoo, mɔ lelabi itə mi ebɔkɔ lə mi fe kase mintsya leetsyue mɔ Anto koto, nya mintsyimɛ lə wə lelabi əsuə lefe saa.

11 “Nlɛ mi asa nyamfo bɔtɛyi bɛ lɛ disuɔyue nɛ nkpe lɛ mɛɛ, lɛ lekɛ mi tsya lɛ ɛsuɛ lɛflo. 12 Kɔfi ko minlɛ mi butɛ ni nkɛ belɛ bɛtsyue fe kase maala mi. 13 Lɛlabi nɛ utidi loofɔ bufi kɛtɛ wɛ bayɛtsyue enso kenke ni bɛnkɛ lɛ ufi wɛ nkɛpɛ utɛ lɛ mɛ disi. 14 Lɛ biyifo lɛ mɔ afi ɛsuɛɛ, ete bɛ biyifo mɔ bayɛtsyue. 15 Mensiembokpo mi miɛ mɔ beyifoyifo mɔmɔ, itsyise nwɛ leeyifo utidi bamba eto keyifo aante asa nnya wɛ onamute leeyifo. Bomu maakpo mi miɛ mɔ bayɛtsyue. Itsyise asa nnya kenke minɔ mintsyiko mɔ Anto ɔfloɔ, mbɔtɛyi mi nnya. 16 Inni mi dɛkɛlɛkɛ mɛ. Bomu mɔ dɛlɛkɛ mi. Nya nlɛkɛ mi miɛ lɛ bisu bɛnwɔ ebibi kɛpɛ, nya ebibi nnya biɔnwɔɔ, lɛ itsyɛ lefe saa. Itɛ bɛ lesa saa nɛ biɔtɔ Anto lɛ mɔ diye ɛsuɛɛ, wuutɛ mi ni. 17 Lɛ nyaso kɔfi ko minlɛ mi butɛ ni nkɛ belɛ mi bɛtsyue.”

Kawunsiɛ Eto Betidi Eekisi Yesu Eto Bakasebi.

18 Yesu ɛsukosɛ nkɛ, “Lɛ kawunsiɛ eto betidi eekisi mii, betɛ biɛ mɔ baka bukisi nko. 19 Lɛ kawunsiɛ kamfo eto betidi binii, eni boola mi fe mɛ ke. Fɛɛ nlɛkɛ mi ntsyiko kawunsiɛ kamfo eto betidi nti nyaso binsini mɛ bale. Nyamfo eso beekisi mi nɛ. 20 Bekloma ditiki nɛ mɛntɛyi mi minkɛ, ‘Ndomunyɛ saa ammo kaso wɛ onamute.’ Lɛ betidi ɛnyɛ mɛ lɛ ɛsuɛɛ, betɛ biɛ boɔnyɛ mi tsya lɛ ɛsuɛ. Lɛ bɛtsyue mɔ etiki kotoɔ, bootsyue mi ale tsya koto. 21 Fɛɛ booyifo mi nyamfo kenke lɛ mɔ disi eso, itsyise benyi futsyɛ lɛtsyese mɛ. 22 Lɛ nnya ete mɛmbɛ ntɛyi mɛ kulesaa, eni

bəmbolo mə lebua yifoyifo eto dikpi. Fεε mómóó, báyifo lebua nya taflatsye saa ensibə booto bə bānte. ²³ Utsyuə saa wə leekisi məe, eekisi mə Anto tsya. ²⁴ Lə nnya ete ményifo keyifo ka kuutsyuə saa dímenyifo tó únyə lə mə ntii, eni bəmbolo mə lebua yifoyifo eto dikpi. Fεε bənyə asa nnya mínyifo, tsyaa balε mə ku mə Anto kenke bukisi. ²⁵ Ele bə nyamfo bə itə nko bə lesa nə báwəni bákpe lə mə kəfi eto kukue əsuə, lə ibə itə nko bə, ‘Bukisi bimba ete békisi mə.’

²⁶ “Lə nyasoo, mootsyese mi Ləwəno Kenke nə ni Ɔwunsəkotsyuə itsyi lə Onanto oflo. Wə luuləkə sitinti lə Onanto əsuə ote. Lefe nə utsyi Anto əmə oflo ubəə, wuudi adansiə lə mə əsuə utə mi. ²⁷ Mi tsya badansiε biudi bitə mə, itsyise bekpe lə mə oflo idu taa kasə ketsyikokə ke.

16

¹ “Ntəyi mi etiki nyamfo kenke bə lə betidi lə bayε butə lə ani lə elo mi lə mi bofokanə əsuə. ² Booləkə mi lə mə nti lə katsyakə, nya lefe ebubə nə lə utsyuə lə mi bolo tsyaa, wuubu nkə ɔlε Onanto busumu lə nnya əsuə. ³ Betidi ebuyifo mi nyamfo eto okle, itsyise benyi mə nye Anto əmə tsya. ⁴ Bomu mbətəyi mi nyamfo ntənsə bə lə lefe nəmə áyo bə beyifo nnya nkoo, lə bekloma biə ntəyi mi nnya nko.

“Mántəyi mi nyamfo lə kasə ketsyikokə itsyise nkε mi lə oflo lefe nəmfə. ⁵ Fεε mómóó, ntə lə nwə létsyese mə oflo. Fεε mi kuutsyuə saa anlε mə bəto nkə sieti mintə. ⁶ Nya se míntəyi

mi nyamfoo, mi ketu eyi ku nkuenlo. ⁷ Fɛɛ nɛ mi bɔtɛyi sitinti minkə, ɛlɛkɛ itə mi bə ndu lə mi ɔflo. Itsyise lə mensuu, Ɔwunsəkotsyuə əmə embubə mi ɔflo. Fɛɛ lə nsuu, mootsyese wə mi. ⁸ Nya lə ubəə, wuuləkə ote kawunsia eto betidi ekpa wue bate bə banya kusu lə lesa nə ni lebua ku lesa nə ni kasɛ yifoyifo ku lesa nə ni Onanto eto lekpo kpokpo. ⁹ Bembote lesa nə ni lebua itsyise bāmfo mɛ bāno eso. ¹⁰ Nya boonyə bətsyə lekpo se banyɛ lə kusu sɛɛ komə əsuə, itsyise ntɔ lə Anto əmə ɔflo nya biensimbunyə mɛ bio. ¹¹ Nya bebote lesa nə ni lekpo kpokpo itsyise Onanto ébolo kawunsia kamfo eto əsuəalenyə əmə dikpi koko.

¹² “Asa kpə si ekpe nnya ele bə ntɛyi mi. Fɛɛ yooso mi butsyi mɔmɔ. ¹³ Fɛɛ lefe nə Lɛwɔno nə lələkə sitinti lə Onanto əsuə kate əbəə, diutə bete sitinti siamə kenke itsyi lə Onanto ɔflo. Nya wəəmbɔtɛyi kulesa lə wə əsuəale əsuə. Bomu wɔtɛyi mi lesa nə waano ku nnya ləəbə bubə. ¹⁴ Wuutə babesə mɔ diye kato itsyise wuuləkə lesa nə ófo utsyiko mɔ ɔflo ote mi. ¹⁵ Lesa saa nə ni Anto əmə eto lelee, eyifo mɔ lele. Nyaso míntɛyi mi minkə Lɛwɔno nəmə ebufi lesa nə mintə wə ubə ote mi.”

Bakasebi Bamə Eto Nkuenlo Ebofani Dis-uəyuə.

¹⁶ Yesu esi ótɛyi nkə, “Ibu sɛkɛ biensimbunyə mɛ bio, nya lə lefe sɛkɛ kama bisi biunyə mɛ.”

¹⁷ Mfó nya wə bakasebi bətsyuə lɛtɔ mə bətsyuə bənkə, “Nya ótɛyi mfo eto kasɔ nkɔpə? Ótɛyi bo nkə, Ibu sɛkɛ boensi embunyə wə bio.

Nya sɛkɛ tsya lə nnya kamaa, busi buunyə wə. Nya usi ɔ́tɛyi bo tsya nkə, ‘Itsyise ntɔ lə Anto əmə ɔflo.’ ¹⁸ Nnya ɔ́tɛyi nkə, ‘Ibu sɛkɛ,’ eto kasɔ ni be? Bóanno lesa nə ɔnlɛ bɔtɛyi eto kasɔ!”

¹⁹ Yesu áte nkə etiki ətsyuə kpe bála lə batɔ wə. Nyaso ɔ́tɛyi mə nkə, “Ntɛyi minkə ibu sɛkɛ biensi embunyə mə bio, nya sɛkɛ lə nnya kamaa, bisi biunyə mə bio. Etiki nyamfo bɛnlɛ bɔlɛ kabe lə mi bətsyuə nti lee? ²⁰ Sitinti minlɛ mi bɔtɛyi minkə biuwi kaminseku, biləkə binəntu. Fɛɛ kawunsiə eto betidi luunyə disuəyuə. Nya mii, nkuenlo ebumuə mi, fɛɛ mi nkuenlo bomə ebofiani disuəyuə. ²¹ Lə usio labe kolee, woakɛ lə bulə əsuə itsyise ɔlɛ kanyi bunyə. Fɛɛ lə ólɛ ubi əmə ólosəə, woata kanyi ka únyə əsuə, itsyise wəənyə disuəyuə nkə ólɛ ubi ókpe lə kawunsiə. ²² Nko seka inte itə mi tsya nɛ. Mómɔɔ, bekpe lə nkuenlo əsuə. Fɛɛ muunyə mi bio. Nya disuəyuə luuyi mi akɔəsi kenke, disuəyuə nə eto okle kuutsyuə saa ləmbofo bofo ketsyiko mi ani kulefe.

²³ “Lə diyi nəmə ayoo, biembɔtɔ mə kulesa. Itsyise nlɛ mi bɔtɛyi sitinti miə lesa nə ke biɔtɔ mɔ Anto lə mɔ diyɛ əsuəə, wuufi ni utə mi. ²⁴ Ibə ese mómɔɔ, bíantɔ tɔ kulesa lə mɔ diyɛ əsuə. Bɛtɔ ete lə utə mi lə mi disuəyuə lə lɛflo lelo.

²⁵ “Ndi mi etiki ɛyɛ lə akpa əsuə. Fɛɛ lefe ebubə nə mensiembudi mi etiki nyenko lə akpa əsuə. Bomu muudi mi etiki wuee itsyi lə Anto əmə əsuə. ²⁶ Lə lefe nəmə ayoo, bɛtɔ wə asa lə mɔ diyɛ əsuə. Minlɛ bɔtɛyi miə mɔɔ, mɔɔtɔ ntɛ

mi. ²⁷ Itsyise Anto əmə kosate aala mi. Waala mi itsyise mi tsya aala mə, nya béfo bəno biə Onanto ɔflo mintsyi mímbə. ²⁸ Sitintii, Anto əmə ɔflo mintsyi mímbə kawunsiə, nya mómó nsi nle budu lə kawunsiə kesu Anto əmə ɔflo.”

²⁹ Nya wə bakasebi leteyi wə nkə, “Mómó, efe alə etiki budi kakpasə wuee, insini lə akpa əsuə. ³⁰ Mfe ko bote boə eyi lesa saa, nya yensife bə kuutsyuə saa si ɔto fə etiki eto kasə. Nyamfo mate ətə bofo bəno boə Onanto ɔflo fétsyi.”

³¹ Mfó Yesu letə mə nkə, “Mómó alə befo bəno? ³² Lefe lə bubə, nya díubə tsya lélo nə boosensə mi nya utsyuə saa luusu wə umə beyani mə mate bitsyə. Fəe lə sitintii, yembuyifo mə mate. Itsyise Anto əmə si ko mə. ³³ Nteyi mi nyamfo lə binyə diyuə se biyifo ləni ku mə eso. Kawunsiə eto betidi ebutə binyə kanyi. Fəe biñyə kekleke! Itsyise mbutəkə kawunsiə kamfo kato!”

17

Yesu Áto Ola.

¹ Se Yesu leteyi mə nyamfo ólosəə, óbesə ənəmi kato nya ɔteyi nkə, “Nto, lefe nəmə éboyo. Besə fə Ubi eto diye kato bə lə fə Ubi tsya lə obesə fə diye kato. ² Itsyise éfi əsuəale kenke ətə wə lə kawunsiə eto betidi kenke əsuə bə mba kenke féfi fətə wəə, lə utə mə nkpə manlo. ³ Nya nkpə manlo ni bə lə betidi lə bate fə, fə nwə hã mate ni Onanto kosate əmə nya lə bate Yesu Kristo wə fátsyese. ⁴ Mbesə fə diye kato nte lə betidi nti.

Nya mínyifo keyifo ka fákpe me læ kóni fə nyifo læ kawunsiə mínlosə. ⁵ Mómoo, Nto, besə fə Ubi eto diyənde kato læ fə ənəmi, diyənde nə əsuə mínkə ku fə fə béyifo kawunsiə.

Yesu Áto Ola Lə Wə Bakasebi Eto Disi.

⁶ “Ntə miə mba fələkə fətə me læ kawunsiə eto betidi ntii, te fə. Fə bale beni nya féfi mə fətə me nya bétsyue fə ditiki koto. ⁷ Nya mómoo, beyi bə lesa saa nə féfi fətə mɛɛ, etsyi fə oflo. ⁸ Mfi kenye ka fətə me fə nsu nteyi mə nsuko mə nya báfo ke. Nya beyi sitinti bə fə oflo mintsyi, nya fə ni nwə létsyese mɛ. ⁹ Nlɛ ola boto læ mə disi, minlɛ ola boto læ kawunsiə eto betidi kenke eto disi. Bomu læ mba féfi fətə me eto disi, itsyise fə kosate eto bale beni.

¹⁰ “Mba kenke ni mə bale eyifo fə bale, nko ke fə bale tsya diyifo mə bale nɛ. Nya mə diyənde lébe kato eyɛ læ mə əsuə. ¹¹ Mómoo, nlɛ fə oflo bubə. Minsibə læ kawunsiə mfo. Fɛɛ məə, besi bakpe læ ke. Anto Kenkə, fə kosate fi fə diye eto əsuəale nnya fətə me abe mə bə læ beyifo bani fe kase bo ku fə diyifo bani. ¹² Lefe nə mínkə læ mə ofloo, nlɛ mə wɛkɛkɛkɛkɛ nya mínse mə eyɛ læ diye nə fətə me əsuə. Nse mə, itə bə kuutsyue saa mánnya læ mə nti, enso utidi wə ele bə onya kokooko, bə læ nnya báwəni bákpe læ Awənisə Kenkə eto Kukue əsuə læ ibə itə.

¹³ “Nya mómoo, nlɛ fə oflo bubə. Nteyi nyamfo læ kawunsiə bə læ mə tsya læ beyi kenke læ mə akəesi ku mə disuəyue nə minlɛ bunyə. ¹⁴ Mbe fə ditiki nəmə letsya ntə mə, nya benni kawunsiə kamə eto bale fe kase

mintsya lenni kawunsiə kamfo eto ole ke. Lə nyasoo, kawunsiə kamə eekisi mə.

¹⁵ “Minlə bəto miə ləkə mə lə kawunsiə kamə. Bomu nle bəto miə lə ase mə, ələkə mə etsyiko Obuale əmə eto ani. ¹⁶ Fə kase minni kawunsiə kamfo eto olee, nko ke mə tsya lenni kawunsiə kamfo eto bale nɛ. ¹⁷ Yifo mə kenke lə sitinti siamə əsuə, itsyise fə ditiki nəmə eyifo sitinti. ¹⁸ Ntsyese mə kawunsiə fe kase fintsya létsyese mə kawunsiə seka. ¹⁹ Lə mə esoo, nyifo mə əsuə kenke ntə fə, bə lə mə tsya lə beyifo kenke lə sitinti siamə əsuə.

Yesu Áto Ola Lə Bafokanɔfə Kenke Eto Disi.

²⁰ “Minlə nyamfo bəto kətə mə mate, bomu nle bəto kətə mba kenke lofo mə banɔ ɛyɛ lə fə Ditiki Sɛɛ nəmə mə bəteyi əsuə. ²¹ Anto, nle bəto miə lə ətə bə lə beyifo bani fe kase fankpe lə mə nya mintsya nkpe lə fə əsuə. Tə lə beyifo bani ku bo bə lə kawunsiə eto betidi lə bafo banɔ bə fə uni létsyese mə.

²² “Ntə mə diyənde nə eto okle ke fətə bə lə məmble lə beyifo bani fe kase bo fə diyifo bani.

²³ Nkpe lə mə, nya fintsya nkpe lə mə. Tə lə beyifo bani kenke bə lə kawunsiə eto betidi lə bate bə fə létsyese mə nya faala mə fe kase faala mə.

²⁴ “Anto, nla miə mba féfi fətə mə lə bəsiə mə lə ɔfɔ lə kaka minsi bə lə bənyə mə diyənde, diyənde nə fətə mə itsyise ála mə fɛ béyifo kawunsiə.

²⁵ “Anto Sɛɛ, kawunsiə eto betidi enyi fə, fɛɛ mə yi fə nya mba mfo tsya yi bə fə létsyese mə.

²⁶ Ntə báte fə wuee, nya muutə besi bate fə

eso nko, bæ læ lelabi næ féfi fətə μεε, læ læke læ mə nya læ mintsya læ nke læ mə.”

18

Yudafə Ɛmuə Yesu.

¹ Se Yesu léto ola əmfə ólosəə, wə ku wə bakasebi édu mfó nya báye læ Kidron eto utukplo bésu kaka nnuəbi eto eyi eto okue kəke utsyuə læke. Nya Yesu ku wə bakasebi dídufə mfó.

² Yuda wə dídu wə utəə, áte mfó itsyise lefe kpəə, Yesu ku wə bakasebi ála disi busu kakpe mfó. ³ Nyasoo, Yuda áyenko Romafə eto bama-manyə ku mba laase Disumuyo eto betsyuə, ba besumunyə ninə ku Farisifə létsyese nya ókpa mə úsuko okue kəke əmə. Bétsyi bemakə ku kakandie ku ate.

⁴ Se Yesu léte asa nnya kenke læəbə wə bubə læ əsuə esoo, óbo úbə ótsyako mə nya óto mə nkə, “Owoe benle bəbəbə?”

⁵ Bətə mbuaye bənkə, “Yesu Nasaretnyə əmə.”

Óteyi mə nkə, “Nyə mə ni wə mfo.” Yuda wə dídu wə útə tsya nyə mə lenti. ⁶ Lefe nə Yesu díte mə mbuaye nkə, “Nyə mə ni wə mfoo,” bésinkli kama kama nya bédu bánə.

⁷ Usi óto mə nkə, “Owoe benle bəbəbə?”

Bətə mbuaye bənkə, “Yesu Nasaretnyə əmə.”

⁸ Mfó nya Yesu leteyi mə nkə, “Mótəyi mi koko minkə, nyə mə ni wə mfoo. Nyaso læ mə uni benle bəbəbə, bitə læ mbamfo læ bedu.”

⁹ Óteyi nyamfo nko, bæ læ lesa nə úkatəyi kokoo,

lè ibè itè sitinti nkè, “Nto, mányansè mba féfi fètè mɛ eto lɛ ɔni lè mɛnti.”

¹⁰ Mfó Simon Petro dínè kalande nè untsyi úlèkè lè akpatsya, nya ówè Usumunyè Ninè Kenke eto uyifoyifo eto kodianito úfè. Ndomunyè èmè eto diye ni Malko.

¹¹ Fɛɛ Yesu áteyi Petro nkè, “Fi fè kalande kamè akpe lè akpatsya kafo! Bubu febu fè yanle bè nnè lesa nè nkpe lè kanyi eto lèkobe nè mɔ Anto dítè mɛ?”

Yudafò Ákpa Yesu Bésuko Annas Ófò.

¹² Nyamfò eto kamaa, Romafò eto bama-manyè eto ditsyukpa ku mè ɔtɔnkɔtɔnko ku Yudafò eto batɔnkpe bètsyuè èmuè Yesu lè èsuèale èsuè bákè. ¹³ Tutɛɛ, bákpa wè bésuko Annas ófò. Annas èmfò eyifò Kayafa eto usièanto. Nya Kayafa èmfò ni Usumunyè Ninè Kenke wè díyifo kesumu eto keyifo lèlè itè nèmí. ¹⁴ Kayafa èmfò ni nwè lèlè Yudafò eto beninè kòlè nkè èlèkè eso bè utidi ɔni kpè lè betidi ba tã eto kɛnyɛ.

Petro Áteyi Nkè Únyi Yesu.

¹⁵ Simon Petro ku okasebi bamba ètèkèko Yesu kama. Okasebi bamba èmfò eyifò Usumunyè Ninè Kenke eto utidiyi, nyaso wè dítèkèko Yesu bésu Usumunyè Ninè Kenke eto diyo, ¹⁶ Fɛɛ Petroo, ènyè lè kesie. Okasebi bamba èmè ésinkli úbè údi etiki ku usiobi wè dínyè lè kesie kɛnyɛ mfó, nya útè nkè Petro tsya dufè lè diyo nèmè kafo.

17 Mfó nya usiobi əmə lətɔ Petro nkə, “Fintsya, osani əmfo eto bakasebi eto oni fenii, lee?”

Mfó Petro dítə mbuayə nkə, “Owo, minni!”

18 Nya se ləyɔ nɛ mə esoo, beyifobi ku mba laase mfó átsyaka ute nya bənyə banɛ boyifə. Nya Petro tsya lənyi úsu únýə lə mə ɔflo mfó ɔnɛ ute əmə boyifə.

19 Lefe nəmfóo, Usumunyə Ninə Kenke ákatɔ Yesu asa itsyi lə wə bakasebi ku asa nnya waate əsuə.

20 Yesu ətə mbuayə nkə, “Meedi betidi ba tã etiki lə obia lə kusə komə kenke eto ənəmi lefe saa. Maate asa lə Disumuyo ku lə ntsyakɔ kaka Yudafo kenke ləəbə katsya. Méndi etiki saa kulefe lə kabiɔkɔ. 21 Nya beso ini mə fanɛ etiki nyamfo bɔtɔ? Tɔ betidi bamfo lesa nə míntəyi mə. Beyi ləsanə míntəyi.”

22 Se Yesu lətəyi nyamfo, mba laase mfó eto oni ko ləɔ wə lə kotosi nya ótɔ Yesu nkə, “Ntsyə feebu fə feedi Usumunyə Ninə Kenke əmə etiki nko?”

23 Yesu ətə wə mbuayə nkə, “Lə ndi etiki bua ətsyuəə, təyi utsyuə saa mfo lə ɔnɔ lesa nə ini. Fɛɛ lə méndi etiki bua saa, beso fáɔ mə?”

24 Mfó nya Annas dífi Yesu wə disi ɔkɛ lə bokle lə ukuə əsuəə, ótsyese Usumunyə Ninə Kenke Kayafa ɔflo.

Petro Esi Óni Yesu.

25 Lefe nəmfóo, Simon Petro si únýə mfó ɔɛ ute boyifə. Nyaso bafefɛ ba dínyə mfó lətɔ wə bənkə, “Fintsya, ini osani əmə eto bakasebi eto oni fenii, lee?”

Mfó Petro áni nya óteyi nkə, “Owo lo, minni mə oni!”

²⁶ Mfó nya Usumunyə Ninə Kenke eto ndomunyə oni eto oyimi wə eto koto Petro léwe létə wə nkə, “Inni fə uni mínyə lə okue mfó lee?”

²⁷ Petro esi útudi kenye óteyi nkə, “Owo lo!” Lamfolamfoo, nya ukuse dítə kenye.

Bákpa Yesu Bésuko Pilato Oflo.

²⁸ Olesianto əmfóo, bákpa Yesu lə Kayafa eto diyə bésuko Romafə eto Aba eto Unyəsie eto kəsiekə. Fəe Yudafə bamə méndufə mfó, itsyise bánla bə bakpe mə əsue kəfio fə lə bedi Ukpə Ása Bo Óyila eto Diyisəe nəmə. ²⁹ Lə nyamfo esoo, Pilato ábə úbə ótsyako mə lə kesie kenye mfó, nya ótə mə nkə, “Nte kabua ka osani əmfo díyifo?”

³⁰ Bətə wə mbuaye bənkə, “Lenni kabua kplə kukətsyuə úyifo, eni boəmbokpa wə boboko fə oflo.”

³¹ Nyaso Pilato áteyi mə nkə, “Nyale bekpa wə bisuko lə mi kosate lə bisu bekponko wə lekpo lə mi kosate eto afi əsue.”

Bətə mbuaye bənkə, “Bəntə bo kusu bənkə bokponko kuutsyuə saa lekpo bolo wə dikpənkpi.” ³² Asa nyamfo əbə nko bə lə lesa nə Yesu létəyi itsyi lə ukpə wə eto okle wəəbə bukpə lə ibə itə nko sitinti.

³³ Mfó nya Pilato dísinkli úsu údufə wə lekanyo mfó, nya ókpadi Yesu ótə wə nkə, “Fə ni Yudafə eto Oka əmə?”

34 Yesu ətə wə mbuaye ótə wə nkə, “Fə kosate ete nle me etiki nyamfo bətə lee, betidi bamba leteyi fə nko itsyi lə me əsuə?”

35 Pilato ətə mbuaye nkə, “Ebu fə Yudanyə mini? Mi kosate eto betidi ku besumunyə nine dífi fə bákpe me le kəni. Be féyifo?”

36 Yesu ətə mbuaye nkə, “Mə sekakediko mentsyi kasə mfo. Lə nya ete mə sekakediko dítsyi kasə mfo ini, eni mə batənkpe ebota me disi bələkə me betsyiko Yudafo eto ani. Fəe mə sekakediko mentsyi kawunsia mfo.”

37 Se óteyi wə nko, Pilato átə wə nkə, “Nyale Oka feni?”

Mfó Yesu leteyi wə nkə, “Fə nle bəteyi fə Oka mini. Nyamfo eso bale me mímbə kawunsia ne, bə lə mbə nləkə sitinti siamə nte. Nya utsyuə saa ke ləətəkəko sitinti siaməə, aano lesa nə maateyi.”

38 Pilato átə wə nkə, “Nya be ni sitinti siamə?”

Balo Yesu Dikpənki.

Se Pilato leteyi nyamfo ólosəə, úsinkli úsu Yudafo oflo lə lekple nya óteyi mə nkə, “Mənyə kabua saa lə wə əsuə lə nnya eso ele bə nlo wə dikpi. 39 Fəe lə mi lekpa əsuəə, lə éyo Ukpə Ása Bo Óyila eto Diyi eto didifee, ele bə nləkə mba bákpe lə diyo eto ɔni ntə mi. Nyaso bela biə nyani Yudafo eto Oka əmə ntə mi?”

40 Mfó nya məmble léfä bəteyi bənkə, “Owo lo! Inni nwə mfo, bomu Baraba!” Nya Baraba əmfo eyifo nwə létaka únyə lə aba əsuə.

19

Pilato Etə Báblɛ Yesu.

¹ Nyaso Pilato ətə bákpa Yesu bédunko nya báblɛ wə fefe ku katambo. ² Nya bamamanyə bamə dífi biyu eto kalɛmɛ béyifo lekpakpa bėti wə lə disi. Nya béfi kafia sia bėti wə fe Oka seka. ³ Nya lə bányi bésu wə oflɔɔ bákateyi wə bənkə, “Yuu, yuuduu! Yudafɔ eto Oka o-o!” Nya lə báteyi wə nkoo, bákanyi kafi wə kasɔ wə lə atosi.

⁴ Pilato esi óbɔ úsu sitiditu nəmə oflɔ lə lekple nya óteyi mə nkə, “Bebe, mookpa wə mboko mi lə bete biə mənnə kabua saa ka úyifo bə lə nlo wə dikpənkpi.” ⁵ Nyaso Yesu ábɔ úbə lekple mfó, ku biyu eto lekpakpa lə wə disi nya onkpe awusia kəntsye. Mfó Pilato áteyi mə nkə, “Bebe! Nyə utidi əmə ńyə mfo!”

⁶ Se besumunyə ninə ku mba laase Disumuyo dínyə wəə, báfa báteyi bənkə, “Sɔ wə amanklasə lə uyikabie əsuə! Sɔ wə amanklasə lə uyikabie əsuə!”

Pilato áteyi mə nkə, “Mi kosate kpa wə bisuko, lə bisu bəsɔ wə lə uyikabie əsuə. Mənnə lebuə saa lə wə əsuə nə eso moolo wə dikpənkpi.”

⁷ Yudafɔ bamə ətə mbuayɛ bənkə, “Bokpe kɔfi ko léte nkə ele bə ukpə. Itsyise óteyi nkə uyifo Onanto eto Ubi.”

⁸ Lefe nə Pilato lenɔ nnya báteyi mfoo, sikpi esi símuə wə sekpe. ⁹ Usinkli údufə lekayo nəmə nya ótɔ Yesu nkə, “Se fetsyi?” Fɛɛ Yesu məntə wə mbuayɛ saa. ¹⁰ Pilato átɔ wə nkə, “Nyale, boni fani fə embudiko mə etiki? Lee

enyi fə nkpe əsuəale mofo butə miə bayani fə nye baso fə lə uyikabie əsuə?”

¹¹ Yesu ətə wə mbuayə nkə, “Eni embokə əsuəale saa lə mə əsuə lenni Onanto dítə fə nnya. Nya əmə eso nwə dífi mə ókpe fə lə kóni díyifo lebuə enso fə nɛ.”

¹² Se Pilato leno nyamfoo, óbɛbɛ kusu nkə eni lə oyani wə. Fɛɛ betidi bamə áfa bembembe bátɛyi bənkə, “Lə ayani wəə, nyalɛ ensini Romafə eto Okankplɛ eto ɔyetsyuə! Utsyuə saa wə dífi wə əsuə úyifo oka, átaɔa únyə lə Romafə eto Okankplɛ Kaisare əsuə!”

¹³ Se Pilato leno etiki nyamfoo, ókpa Yesu óbɔnko nya úsiə lə lekpokpome əsuə lə kaka baakpo bə leba eto kaso nya baakpo bə Gabata lə Hebri eto sele əsuə. ¹⁴ Diyi nəmə éyifo fe kakomi eto lefosi ənuə eti lə diyi nə eto kəsiasə boodi Ukpə Ása Bo Óyila eto diyi.

Nya Pilato lɛtɛyi betidi bamə nkə, “Nyə mi Oka!”

¹⁵ Báfa bátɛyi bənkə, “Lo wə! Lo wə! So wə lə uyikabie əsuə!”

Pilato áto mə nkə, “Bela biə nso mi oka əmə mmanklasə lə uyikabie əsuə?”

Mfó nya besumunyə ninə dítə wə mbuayə benkə, “Bunsibə oka saa enso Romafə eto Okankplɛ Kaisare!”

¹⁶ Se bátɛyi wə nkoo, Pilato áyani Yesu útə bamamanyə nkə baso wə lə uyikabie əsuə. Nyaso bákpa Yesu bédunko.

Bamamanyə Áso Yesu Bámanklasə Lə Uyikabie Əsuə.

¹⁷ Bətə wə kosate étsyi wə uyi əmə úsu údufu kaka baakpo Ditidisi Ku Kalua. Baakpo mfó lə Hebri eto sele bə Golgata. ¹⁸ Mfó básɔ wə lə uyikabie əsuə. Básɔ betidi inuə bamba tsya lə mə keyikabie bamba əsuə bakɔ ku wə, ɔni lə Yesu eto kəməni nya unuəfə lə wə kodianɪ.

¹⁹ Pilato áwɔni etiki ətsyuə útə béfi básɔ lə uyi əmə əsuə lə Yesu eto disi kato. Nnya b́awɔni ni bə, “Yesu Nasaretnyə, Yudafo Eto Oka Ɛmə.” ²⁰ Yudafo kpə ákla etiki nyamfo, itsyise kaka básɔ Yesu bamanklasə lə uyikabie mantsyo ku umənkplə əmə. B́awɔni asa nyamə lə Hebri ku Roma ku Griki eto bele əsuə. ²¹ Besumunyə ninə áni etiki nyamfo nya b́ateyi Pilato bənkə, “Manwɔ ni fənkə, ‘Yudafo eto Oka,’ bomu wɔni fənkə, ‘Utidi əmfo áteyi nkə, “Mɔ ni Yudafo eto Oka.” ’ ”

²² Mfó Pilato díte mbuayɛ nkə, “Lesə nə míwɔnii, mbɔwɔni nlosə.”

²³ Se bamamanyə bamə lesə Yesu lə uyikabie b́alosə, béfi wə awu nnya ókpe nya b́esie nnya lə akpa ana. Nya utsyuə saa dífi lekpa lɔni. Fɛɛ wə awu ani ébu. Awu nyamfoo, b́anka nnya kukalebe saa, bomu budi b́edi nnya idu lə simuə isu ekpo lə akpa eti.

²⁴ Bamamanyə bamə áteyi mə b́etsyuə bənkə, “Boembusie awu nyamfo b́etsyuə. Bomu bitə lə bokpo asa b́osə lə bobə futsyɛ luudi lə bufi nnya butə wə.”

Nyamfo əbə itə nko bə nnya b́awɔni b́akpe lə Awɔnisa Kɛnkɛ eto Kukue əsuəə, əbə itə nko sitinti bə,

“B́esie mɔ awu bətə b́etsyuə.

Nya bákpo asa baseε lə mɔ awu əsuə.”
Nya lə sitinti tsyaa, nko bamamanyə bamə
diyifo nε.

²⁵ Nya mba dínyə lə Yesu eto uyikabie komə
ɔflo ni Yesu eto ambe ku wə ambe eto ɔyimisio
ku Maria wə ni Klopa eto usiə, ku Maria
Magdalenyə. ²⁶ Se Yesu dínyə wə ambe ku wə
okasebi wə eto asa waala tinti nyə mfóo, ɔteyi
wə ambe nkə, “Mbe, nnyə fə ubi!”

²⁷ Mfó nya ɔteyi okasebi əmə tsya nkə, “Nnyə
fə ambe.” Nyaso idu lə lefe nəmfóo, okasebi
əmə ákra wə úsuko wə diyo nya óle wə ola.

Yesu Ɛkpə.

²⁸ Yesu áte nkə mɔmɔɔ, wóolosə lesa saa nə
ele bə uyifo. Nya, bə lə lesa nə bawɔni bákpe
lə Awɔnisa Kεnkε eto Kukue əsuə lə ibə itə nko
esoo, Yesu áteyi nkə, “Utukεε lε mε.”

²⁹ Lə mfóo, ɔlɔtsyi utsyuə ətsyə mfó wə béy-
isə ku nte bo dínyənki. Nyaso béfi sekuayεbo
bákpe lə nte bomə əsuə nya béfi bákpe lə uyi
utsyuə wə baakpo hisopo əsuə bábese kato
bətəkə wə lə kenyε. ³⁰ Se Yesu dínə nte bomə
ólosə, ɔteyi nkə, “Mɔmɔɔ, yóolo!”

Nya óbokosə wə disi kasɔ, nya óma kenyε.

³¹ Diyi nəmfo eyifo Fida, nya ni kəsiesə eyifo
Ɔnweditsyəyi kplε itə Yudafɔ, nyaso bánla bə
bekpənkpə kε bafaka lə uyikabie əsuə eyo
Ɔnweditsyəyi mfó. Nyaso bátɔ Pilato bə utə
mə kusu lə besu bəfəsə mə akpa lə bələkə mə
betsyiko lə uyikabie əsuə. ³² Itə bamamanyə
bamə əbə bəfəsə utidi tute ku nwə nse eto
akpa. Mə básɔ báfakasə lə keyikabie əsuə lə

Yesu ɔflo. ³³ Fɛɛ se báyo Yesu ɔflo, bənyə bə wə ébukpə koko. Nyaso bénsifəsə wə akpa. ³⁴ Bomu omamanyə ɔni éfi wə lefle óto wə lə lekpa. Lamfolamfo kɔtɔ ku ntu ko ləbɔ.

³⁵ Nwə dínyə asa nyamfo, wə dídi nnya adansie bə lə mi tsya lə befo bənɔ. Nya nnya ótyei eyifo sitinti. Nya uyi wuee nkə sitinti ini ótyei. ³⁶ Bəyifo nyamfo bə lə nnya nkpe lə Awɔnisa Kenkɛ eto Kukue əsuə lə ibə itə fe kase báwɔni bənkə, “Lɛ wə dikubi lɔni kulaa tsyaa, bembufəsə ni.” ³⁷ Nya báwɔni asa bamba bákpe lə Awɔnisa Kenkɛ eto Kukue əsuə tsya nɛ bɔtyei nkə, “Betidi ebotakasə ənəmi babe nwə eto lekpa bəse lefle bédunsə.”

Bébikə Yesu.

³⁸ Nyamfo eto kamaa, Yosef wə ditsyi umə wə baakpo Arimatia, əbə ótɔ Pilato nkə lə oyani Yesu eto ɔkɔ utə wə. Yosef əmfo eyifo Yesu eto okasebi utsyuə. Fɛɛ wóanla nkə betidi te, itsyise úkate Yudafo eto beninə sikpi eso. Pilato átɔnɔ útə wə. Nyaso Yosef əbə ófo ɔkɔ əmə údunko. ³⁹ Nikodemə wə ləbiɔ úsu Yesu ɔflo ketsye kani tsya ətəkəko Yosef əmfo. Útsyi afa nnya befi kalɔ ɔkɔ itə busu kəbikə, fe uyudu ku afa nnya laanyi fifiifi baakpo bə alɔɛ, nya nyamblɛ eto kalende eboyo kilo awosi ətsyə, úsuko. ⁴⁰ Betidi inuə bamfo éfi afa nyamfo bédiki Yesu eto ɔkɔ əmə lə əsuə nya bəfi kafia flubia ka lefo koya bəmli wə lə əsuə fe kase Yudafo díkalɔ ɔkɔ itə bubikə. ⁴¹ Nya ɔkɔɛ kəkɛ utsyuə akɛ lə kaka bálo Yesu ɔflo.

Nya læ mfóo, béku kudi fɔfɔ ko kafo bembikəto kuutsyuə bənyə. ⁴² Se diyi nəmfo eto kəsiesə luudi Ɔnwəditsyəyi nya kudi komə tsya læfi mfó esoo, béfi Yesu eto ɔko əmə bəsu bəbikə mfó.

20

Bakasebi Bamə Ɔnyə Bə Kudi Komə Tə Kefufu.

¹ Kəsida eto kolensianto se kale dímənsiə to kaloo, Maria Magdalene əsu kudi komə ɔflo nya únyə nkə báminansə leba nə diti læ kudi komə kənyə mfó. ² Nyaso útsyetsyi úsu Simon Petro ku okasebi wə Yesu laala ɔflo. Nya ɔtyei mə nkə, “Bətsyə əbə bətsyi Bonamute bédunko læ kudi komə kafo. Nya bunyi kaka bətsyi wə bəsu bətsyə!”

³ Mfó nya Petro ku okasebi ɔni əmə dídu bə beesu kudi komə ɔflo. ⁴ Mə inuə bamə ɛtsyetsyi batɔ, fɛɛ okasebi əmə áfe Petro nya oka wə kudi komə ɔflo mfó budufə. ⁵ Úbə kaso útsyue ənəmi óbe kudi komə kafo. Únyə mfiə flubia bomə, fɛɛ wéndufə ko kafo. ⁶ Simon Petro wə dítəkə kama ubəə, áyɛ údufə kudi komə kafo nya únyə se mfiə flubia bomə nkpo læ kudi kafo læ kaso mfó. ⁷ Fɛɛ béfi kafia ka béfi bákɛ Yesu disi bətsyə lete, ke mánko ku mfiə flubia fɛfɛ bomə. Bəkənə ke bətsyə lete. ⁸ Mfó nya okasebi wə leka kudi komə ɔflo búdufə tsya dídufə ko kafo. Únyə asa nyamə, nya ófo ɔno. ⁹ Tsya, fɛɛ bánno to kaso nnya Awɔnisa Kənkə letəyi nkə ele bə Yesu taka utsyi okomə ubə nkpe.

Yesu Eləkə Əsuə Óte Maria Magdalene.

¹⁰ Nyamfo eto kama nya bakasebi bamə dísinkli bésu oto. ¹¹ Fəe Maria əbə únyə læ kudi komə oflo kewi keku. Nya lefe nə únyə mfó onle keku buwii, usi úbə kasə óbe kudi komə kafo. ¹² Mfó únyə Onanto eto batənkpe inuə ba nle mfia flubia bensi læ kafo mfó. Oni si læ kaka Yesu eto disi dítsyə nya unuəfə nsi læ wə akpa eti.

¹³ Bátə wə bə, “Boambe, beso fanle keku buwi?”

Mfó nya Maria tsya dítə mbuayə nkə, “Bət-syə əbə bétsyi mə Onamute bedunko, nya mante kaka bétsyi wə besuko!” ¹⁴ Lamfolamfo se ótsyi əwuninsə, únyə se Yesu nyə mfó. Fəe woante nkə Yesu uni.

¹⁵ Mfó Yesu letə wə nkə, “Boambe, beso fanle keku buwi? Owoe fanle bəbəbə?”

Fəe úbu nkə, nwə laabe mfó uni, nyaso ótəyi wə nkə, “Boanto, læ fə uni dítsyi wə fédunko, nyalə təyi mə kaka fétsyi wə fésuko læ nsu ntsyi wə ndunko.”

¹⁶ Nya Yesu lékpadi wə nkə, “Maria!”

Ótsyi əwuninsə útə ənəmi Yesu nya ókpadi wə læ Hebri eto sele əsuə nkə, “Rabuni!” Eto kasə ni Oteasa.

¹⁷ Mfó Yesu letəyi wə nkə, “Sinkli ayə mə butidi eto, itsyise ménsinkli tə nsu Anto əmə oflo kato. Bomu du esu atəyi mə bayimi fə nsinkli ntə læ nwə ni mə Anto ku mə Anto, mə Onanto ku mə Onanto oflo.”

¹⁸ Nyasoo, Maria Magdalenyə əsu ótəyi bakasebi bamə nkə únyə Bonamute əmə nya ótəyi mə asa nnya Yesu letəyi wə.

Yesu Eləkə Əsuə Óte Wə Bakasebi.

¹⁹ Kósida komə eto ditsyitsyo lefee, bakasebi bamə ákə besi læ diyo nya bėti mə əsuə bákpe keklege, se banle Yudafo eto beninə sikpi bote eso. Nya Yesu díbə unyə læ mə ntinti, nya ótəyi mə nkə, “Diyuə læ disiakó mi.” ²⁰ Se ótəyi nyamfo ólosəə, úfi wə ani ku lekpaake óte mə. Əsuə əyuə bakasebi bamə se bənyə Bonamute əmə eso.

²¹ Nnya kamaa, Yesu esi ótəyi mə nkə, “Diyuə læ disiakó mi. Fe kase Anto əmə létsyese məə, nko ke mintsyə nle mi botsyese nə.” ²² Se ótəyi nyamfo ólosəə, ówula ókpo læ mə nya ótəyi mə nkə, “Befo Ləwəno Kənkə nəmə. ²³ Lə bifi betidi eto abua betsyə məə, Onanto éfi nnya ótsyə mə, fəə mba eto abua beni bufi katsyəə, Onanto tsyə mémfi nnya ótsyə mə.”

Yesu Eləkə Əsuə Ote Toma.

²⁴ Lefe nə Yesu díbəə, Toma, lefosi bakasebi inuə bamə eto əni wə bensi baakpo Əfimfinyəə, manke mə lenti. ²⁵ Nyaso se úbəə, bakasebi fəfə bamə átəyi wə bənkə, “Búnyə Bonamute əmə.”

Mfó nya Toma létəyi mə nkə, “Lə mənnəə belakabi eto afabe læ wə ani bə læ mfi mə lenimi inkpe læ nnya kafo nya mimfi mə kəni minkpe læ wə lekpaake, məmbofo nno kulefe.”

²⁶ Kósida kəni eto kamaa, bakasebi bamə esi bákə bəsi læ diyo kafo, nya Toma ákə mə lenti. Besi bėti biku le diyo nəmə əsuə bakə. Tsyə fəə, Yesu əbə únyə læ mə ntinti nya ótəyi nkə, “Diyuə læ disiakó mi.” ²⁷ Nya ótəyi Toma nkə, “Bə læ əbə efi fə lenimi akpe mfo, læ abe mə

ani. Lə efi fə kəni akpe lə mə lekpaqe, lə aye fə mamfokano, nya lə afo ano!”

²⁸ Tomasi ələkə kənye ótəyi nkə, “Mə Onamute ku mə Onanto!”

²⁹ Mfó nya Yesu lətəyi wə nkə, “Se fənyə mə esoo, áfo áno. Diyue itə mba dímənyə mə, fəe báfo báno!”

³⁰ Yesu esi úyifo ayanisa kpə óte lə wə bakasebi kpə eto ənəmi nnya bəwəni bákpe lə kukue komfo. ³¹ Fəe bəwəni nyamfo bətsyə bə lə befo beno biə Yesu ni Nwə Onanto Lékpó Ɖhile Utsyə ku Onanto eto Ubi kosate əmə. Nya əye lə bofo kano lə wə əsuəə, biunyə nkpe manlo.

21

Bənyə Yesu Lə Ditumbukple Ɖflo.

¹ Nyamfo eto kamaa, Yesu esi úləkə wə əsuə óte wə bakasebi lə Tiberia eto Ditumbukple Ɖflo. Nya nyə kase íbə. ² Diyi lonii, Yesu eto bakasebi bətsyue átsya besi. Mə ni Simon Petro ku Tomasi nwə tsya bensi baakpo Ɖfimfinyə ku Nataniel nwə ditsyi Kana lə Galilea eto kaso ku Sebedeo eto bebi ku Yesu eto bakasebi bamba. ³ Mfó nya Simon Petro lətəyi mə nkə, “Meesu nta asabu lə mbə.”

Mfó nya mə tsya lətəyi wə bənkə, “Bontsya ebutəkəko fə busu.” Nyaso bəsu bədufə lə ɔklo əsuə nya bədu bəsu. Fəe lə ketsye ka kenkee, bənləkə akpe saa.

⁴ Nya lefe nə kofe lela koə koatoo, Yesu əbə únyə lə ditimbu nəmə kənye. Fəe bakasebi

bamə mənnyə wə bətsyə lekpo. ⁵ Nya ótə mə nkə, “Bakosobi, bíənləkə akpə saa lee?”

Bətə mbuayə bənkə, “Owo lo!”

⁶ Nya ótəyi mə nkə, “Beta mi asabu nyamə bekpo lə ɔklə əmə eto kodiani, lə binyə lesaat-syue biləkə.” Nyaso bəyifo nko. Binə bia bələkə efui bəə, bamfo asabu nyamə bunə kələkə.

⁷ Okasebi wə eto asa Yesu laala átəyi Petro nkə, “Bonamute uni!” Se Simon Petro lenə nkə Bonamute unii, úfi wə awukentsyue ótsyasə lə nkə, itsyese úləkə nnya utsyue, nya ósa údufə lə ntu bomə əsuə tuu. ⁸ Fəfə bakasebi fəfə bamə əsiə lə ɔklə əmə balə bubə, balə asabu nnya díyi ku akpə bunə. Bántsyonko utuflo, yuutsyue fə akpaləkələkə kolofa. ⁹ Se bábo lə ɔklə əmə kafo bənyə kasoo, bənyə se bátsyaka aka eto ute wə əsuə bákpə akpə ətsyue. Abolo utsyue tsya ətsyue mfó.

¹⁰ Nya Yesu letəyi mə nkə, “Bifi akpə ətsyue nnya bíləkə mómə beboko.”

¹¹ Mfó nya Simon Petro dísu údufə lə ɔklə əmə nya únə asabu nnya díyi ku akpə nnya lemə óboko ketu kənyə. Akpə nyamə eto etu ni kolofa awosi anə ətsyue. Ite bə akpə nyamə efui nko tsyaa, asabu nyamə mánla. ¹² Lə nyamfo eto kamaa, Yesu átəyi mə nkə, “Bibə bidi lesa.” Fəfə bakasebi bamə eto kuutsyue mámfo ɔkə bokpə kato wə nkə, “Owoe feni?” Itsyise báte bə Bonamute uni. ¹³ Nyaso Yesu ésu mə oflo nya úfi abolo əmə útə mə. Nko ke úfi akpə nyamə tsya útə mə nɛ.

14 Nyamfo ni ditsyɛfɛ se Yesu dílɛkɛ wɛ ɛsuɛ ótɛ wɛ bakasebi se bátakasɛ wɛ betsyiko ɔkɔmɛ nɛ.

15 Se bɛdi lesa bálɔsɛ, Yesu áto Simon Petro nkɛ, “Simon, Yohanes eto ubi, aala mɛ aso kase bafɛfɛ bamfo laala mɛ?”

Útɛ mbuayɛ nkɛ, “Ee, Bonamute! Fɛ kosate yi fɛnkɛ maala fɛ.”

Mfó nya Yesu letɛyi wɛ nkɛ, “Lɛ mɔ basamubi ola.”

16 Lɛ nyamfo eto kamaa, Yesu esi óto wɛ dinuɛfɛ nkɛ, “Simon, Yohanes eto ubi, aala mɛ?”

Petro esi útɛ wɛ mbuayɛ nkɛ, “Ee, Bonamute! Fɛ kosate yi fɛnkɛ maala fɛ.”

Mfó Yesu disi ótɛyi wɛ nkɛ, “Lɛ mɔ basamu ola!”

17 Yesu esi óto wɛ ditsyɛfɛ nkɛ, “Simon, Yohanes eto ubi, aala mɛ?”

Bɔto bomfo ɛlɛ Petro, itsyise ditsyɛfɛ sɔɔ ni nɛmfo nɛ se Yesu letɔ wɛ nkɛ, “Aala mɛ?” Nyaso ótɛyi Yesu nkɛ, “Bonamute, eyi lesa saa. Nya fɛ kosate nyi fɛnkɛ maala fɛ!”

Mfó nya Yesu letɛyi wɛ nkɛ, “Lɛ mɔ basamu ola. 18 Sitinti minlɛ fɛ bɔtɛyi minkɛ, lefe nɛ fedi okosobii, ákafo kafia buti fɛ kosate kesu kaka ke fála. Fɛɛ lefe nɛ fákabee, ebobese fɛ ani kato nya utidi bamba luubɛ okle fɛ kafia fɛ wookpa fɛ usuko kaka fanla fɛ eesu.” 19 Yesu átɛyi nyamfo nko lɛ ufi ulɛkɛ ukpɛ wɛ eto okle Petro lɛɛbɛ bukpɛ wɛ luulɛkɛ Onanto eto diyɛnde ote.

Nyamfo eto kamaa, Yesu átɛyi wɛ nkɛ, “Tɛkɛko mɛ.”

²⁰ Se Petro letsyi ɔwuninsəə, únyə se okasebi wə Yesu laala n̄yə wə kama. Wə ni okasebi wə dísiə ɔkpɔ Yesu, lə lefe nə békedi ditsyitsyosa fɛfɛ fɛ ɔtɔ Yesu nkə, “Bonamute, owəe luudu fə utə?” ²¹ Nyaso se Petro dínyə wəə, ɔtɔ Yesu nkə, “Bonamute, ntsyə ini lə wə əsuə?”

²² Yesu ətə wə mbuayɛ nkə, “Lə nla miə usiə nkpə isu ese lefe nə muusinkli mbə bioo, be eka fə ela? Fəə, təkəko mɛ!”

²³ Etiki nyamfo ába ékpɔ lə mba ntəkəko Yesu kama nti bə okasebi əmfo əmbə bukpə. Fɛɛ Yesu mántɛyi wə nkə wəəmbukpə. Nnya ɔtɛyi ni nkə, “Lə nla miə usiə nkpə isu ese lefe nə muubəə, be eka fə ela?”

²⁴ Wə ni okasebi wə nɛ adansiɛ budi lə asa nyamfo əsuə, nya wə tsya ni nwə ləwɔni nnya utsyə nɛ. Nya buyi boə nnya əsuə údi adansiɛɛ, eyifo sitinti.

²⁵ Yesu esi úyifo asa bamba kpə tsya. Lə nnya ete báwɔni nyamble bətsyə lɔni lɔni lɔnii, mfo nno miə eni bembunyə ekue nyamə eto kətsyəkə lə kawunsiə kamfo kenke kulaa tsya.

**Onanto eto kakle ɔɔ; Sɛkpɛle
Sekpele: Onanto eto kakle ɔɔ; Sɛkpɛle New
Testament**

copyright © 2008 Wycliffe Bible Translators, Inc.

Language: (Sekpele)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 22 Sep 2022 from source
files dated 13 Jul 2022

5fc03d2a-3cf8-5607-a6e0-9e1e197140bd